

唐書合鈔

唐書卷第十七

本紀十七

敬宗

敬宗睿武昭愍孝皇帝諱湛穆宗長子母曰恭僖太后

王氏元和四年六月七日生於東內之別殿始封鄂王長慶

元年三月封景王二年十二月立爲皇太子四年正月

壬申穆宗崩癸酉皇太子卽位柩前時年十六門下侍郎同平

章事李逢吉攝冢宰甲戌左僕射韓臯卒丙子羣臣準遺詔奏皇

帝寶冊禮畢詔賞神策諸軍士人絹十匹錢十千畿內

諸軍鎮絹十匹錢五千其餘軍鎮頒給有差內出綾絹

三百萬段以助賞給穆宗初卽位在京軍士人獲五十

千在外軍鎮差降無幾至是宰臣奏議請量國力頒賞
故差減於先朝物議是之羣臣五上章請聽政從之二
月辛巳朔上纒服見羣臣於紫宸門外壬午渤海送備
宿衛大聰睿等五十人入朝癸未

尊母爲皇太后皇
太后爲太皇太后 貶

戶部侍郎李紳爲端州司馬丙戌貶翰林學士駕部郎
中知制誥龐嚴信州刺史翰林學士司封員外郎知制
誥蔣防汀州刺史皆紳之引用者以右拾遺吳思爲殿
中侍御史充入蕃告哀使李紳之貶李逢吉受賀羣官
至中書而思獨不往逢吉怒而斥爲遠使戊子河北告
哀使諫議大夫高允恭卒於東都辛卯敕沒掖廷宮人

先配內園宮人並宜放出任其所適己亥册大行皇帝
皇太后爲太皇太后庚子西川節度使杜元穎進罨畫

打球衣五百事非禮也辛丑上始御紫宸殿受朝既退
幸飛龍院厚賜內官等物有差以米貴出太倉粟四十

萬石於兩市賤糶以惠貧民癸卯夜太白犯東井北轅
乙巳上率羣臣詣光順門册皇太后丁未御中和殿擊

球賜教坊樂官綾絹三千五百匹戊申擊球於飛龍院

黃洞蠻降己酉大合樂於中和殿極歡而罷內官頒賜有差

三月庚戌朔貶司農少卿李彤吉州司馬以前爲鄧州
刺史坐贓百萬仍自刻德政碑故也壬子上御丹鳳樓

大赦天下京畿夏青苗錢並放秋青苗錢每貫放二百
文天下常貢之外不得進獻六宅七宅諸王女宜令每
年於選人中選擇降嫁今後戶帳田畝五年一定稅

減宮

禁經費乘輿服膳罷貢鷹犬元和
以來兩京藩鎮歸地者子一子官

是日風且雨甲寅始

於延英對宰臣丙辰以尚書右丞韋顥爲戶部侍郎戊
午禮儀使奏外命婦正旦及四始日舊行起居之禮伏
以禮煩則瀆請停從之庚申工部尚書胡証檢校戶部
尚書京兆尹甲子故山南東道節度使牛元翼家爲王
廷湊所害上惜其冤橫傷悼久之仍歎宰執非才縱姦
臣跋扈翰林學士韋處厚奏曰理亂之本非有他術順

人則理違人則亂陛下當食歎息恨無蕭曹今有一裴
度尙不能用此馮唐所以感悟漢文雖有頗牧不能用
也以太子少保張宏靖爲太子少師分司東都太子賓
客令狐楚爲河南尹丁卯以刑部尚書段文昌判尚書
左丞事戊辰羣臣入閣日高猶未坐有不任立而踣者
諫議大夫李渤出次白宰相俄而始坐班退左拾遺劉
栖楚極諫頭叩龍墀血流上爲之動容仍賜緋魚袋編
昨徐忠信闕入浴堂門杖四十配流天德庚午賜內教
坊錢一萬貫以備遊幸

太白經天○舊書天文志壬申

是夜太白犯東

井北轅甲戌夏州節度使李祐奏於塞外築烏延宥州

臨塞陰河陶子等五城以備蕃寇又以党項爲盜於蘆子關北木瓜嶺築壘以扼其衝乙亥幸教坊賜伶官綾絹三千五百匹夏四月庚辰朔甲申以御史大夫王涯爲戶部尚書兼御史大夫充鹽鐵轉運等使壬辰兵部侍郎武儒衡卒丙申賊張韶等百餘人至右銀臺門殺闈者揮兵大呼進至清思殿登御榻而食攻弓箭庫左神策軍兵馬使康藝全率兵入宮討平之是日上聞其變急幸左軍丁酉上還宮羣臣稱慶諫議大夫李渤以上輕易致盜言甚激切己亥九仙門等監共三十五人並笞之辛丑染坊使田晟段政直流天德以張韶染坊

役夫故也詔雪吐突承璀之罪令男士擘改葬之丙午
宰臣李逢吉封涼國公牛僧孺封奇章縣子五月己酉
朔乙卯制以正議大夫吏部侍郎上柱國涇源縣開國
男食邑三百戶賜紫金魚袋李程守本官同中書門下
平章事以朝議郎守戶部侍郎兼御史大夫判度支上
柱國賜紫金魚袋竇易直爲朝散大夫本官同中書門
下平章事判度支戶部侍郎韋顛賜金紫己未割富平
縣之豐水鄉下邽縣之翟公鄉澄城縣之撫道鄉白水
縣之會賓鄉以奉景陵癸亥以鹽州刺史傅良弼爲夏
州節度使東都江陵監大轉運留後並改爲知院官從

其使王涯請也六月己卯朔以左神策大將康藝全爲

鄜坊節度使辛巳敕以霖雨命疏決京城繫囚

儀乙酉李逢吉

爲尚書右僕射

庚寅大風吹壞延喜景風等門工部侍郎張惟

素卒壬辰以左金吾衛大將軍李愿檢校司空兼河中

尹御史大夫河中絳隰節度使丙申山南西道節度使

守司空裴度加同平章事度之拜興元也爲宰相李逢

吉所排不帶平章事李程韋處厚日爲度論於上前故

有是命加陳許節度使李光顏守司徒癸卯太子少師

張宏靖卒乙巳浙西水壞太湖隄水入州郭漂民廬舍

丁未以吏部尚書趙宗儒爲太常卿兵部尚書鄭綱爲

吏部尚書秋七月戊申朔己酉睦州青溪等六縣大雨山谷發洪水汎溢漂城郭廬舍庚戌以前河中節度使郭釗爲兵部尚書戊午太子賓客許季同卒辛酉疏靈州特進渠置營田六百頃乙丑鄆曹濮暴雨水溢壞城郭廬舍丁卯敕以穀貴凡給百官俸內一半合給匹段今宜給粟每斗折錢五十文辛未以大理卿崔元略爲京兆尹兼御史大夫甲戌右金吾衛大將軍李祐進馬二百五十匹御史溫造於閣內奏彈祐罷使違敕進奉祐趨出待罪詔宥之襄均復等州漢江溢漂民廬舍丙子浙西觀察使李德裕奏詔令當道造釜子二十具計

用銀一萬三千兩金一百三十兩昨已進兩具用銀一

千三百兩當道在庫貯備銀無二三百兩皆百計收市

方成此兩具臣當道唯有留使錢五萬貫每事節儉支

費猶欠十三萬貫不足臣若因循不奏則負陛下任使

之恩若分外誅求又累陛下慈儉之德伏乞宣令宰臣

商議何以遣臣得上不違宣索下不闕軍須不困疲人

不歛物怨時有詔罷進奉故德裕有是奏八月丁丑朔

是夜火犯土星

新書天文志庚辰

妖賊馬文忠與品官李文德

等凡一千四百人將圖不軌皆杖一百處死

新書丁酉

癸未

火犯東井甲申詔於關內關東折糴和糴粟一百五十

萬石陳許蔡鄆曹濮等州水害秋稼丁亥

天
文
志

火入

東井已丑以李愷孫宏爲河南府兵曹叅軍蔣清孫鄆
爲伊陽令錄忠臣後也是夜金犯軒轅右角壬辰江王
府長史段釗上言稱前任龍州刺史近郭有牛心山山
上有仙人李龍遷祠頗靈應元宗幸蜀時特立祠廟上
遣高品張士謙往龍州檢行迴奏牛心山有掘斷處羣
臣言宜須修築時方沍寒役民數萬計東川節度使李
絳表訴之甲午以太常卿趙宗儒爲太子少師乙巳宣
武軍節度使韓充卒

黃洞蠻
寇安南

九月丙午朔丁未波斯大

商李蘇沙進沈香亭子材拾遺李漢諫云沈香爲亭子

不異瑤臺瓊室上怒優容之庚戌以河南尹令狐楚檢
校禮部尚書汴州刺史宣武軍節度汴宋亳觀察等使
乙卯罷理甌使以諫議大夫李渤知甌奏請置胥吏添
課料故也戊午加朱克融檢校司空詔浙西織造可幅
盤條繚綾一千匹觀察使李德裕上表論諫不奉詔乃
罷之己未以兵部侍郎王起爲河南尹甲子吐蕃遣使
求五臺山圖己巳浙西淮南各進宣索銀絁奩三具冬
十月丙子朔宗正寺選尚縣主婿和元亮等二十五人
各賜錢三十萬令備吉禮辛巳以吏部侍郎崔從爲太
常卿庚子嶺南節度使鄭權卒辛丑吐蕃貢犛牛鑄成

銀犀牛羊鹿各一壬寅以鄂岳觀察使崔植檢校吏部
尚書兼廣州刺史御史大夫嶺南節度觀察經略使以
戶部侍郎韋顓爲御史中丞兼戶部侍郎以御史中丞
鄭覃權知工部侍郎以刑部侍郎韋宏景爲吏部侍郎
以權知禮部侍郎李宗閔權知兵部侍郎以工部侍郎
于敖爲刑部侍郎十一月丙午朔戊申安南都護李元
喜奏黃家賊與環王國合勢陷陸州殺刺史葛維蘇常
湖岳吉潭郴等七州水傷稼庚申葬穆宗於光陵十二
月乙亥朔癸未迴鶻吐蕃奚契丹遣使朝貢襄州柳公
綽滄州李全略晉州李寰滑州高承簡並自尚書加檢

校右僕射以前起居舍人劉栖楚爲諫議大夫淮南節度使王播厚賂貴要求領鹽鐵使諫議大夫獨狐朗張仲方起居郎孔敏行柳公權宋申錫補闕韋仁實劉敦儒拾遺李景讓薛廷老等伏延英抗疏論之戊子夜月掩東井庚寅加天平軍節度使烏重胤同平章事乙未徐泗王智興請置僧尼戒壇浙西觀察使李德裕奏狀論其姦幸時自憲宗朝有敕禁私度戒壇智興昌禁陳請蓋緣久不興置由是天下沙門奔走如不及智興邀其厚利由是致富時議醜之丁酉宰相牛僧孺進封奇章郡公李程彭原郡公竇易直晉陽郡公並食邑三千

戶吏部侍郎韓愈卒

寶曆元年春正月乙巳朔

己酉朝獻於太清宮庚戌朝享於太廟

辛亥親

祀昊天上帝於南郊禮畢御丹鳳樓大赦改元寶曆先

是鄂縣令崔發坐誤辱中官下獄是日與諸囚陳於金

鷄竿下俟釋放忽有內官五十餘人環發而毆之發破

面折齒臺吏以蔽蔽之方免有詔復繫於臺中宰相救

之方釋宰相牛僧孺累表乞解機務帝許以郊禮後乙

卯以僧孺檢校禮部尚書同平章事鄂州刺史武昌軍

節度鄂岳觀察使於鄂州特置武昌軍額寵之也淮南

節度使王播兼諸道鹽鐵轉運使

表李程守中書侍郎竇易直守門下侍郎

王申以給事中李渤爲桂州刺史兼御史中丞桂管防禦觀察使李德裕獻丹宸箴六首上深嘉之命學士韋處厚優其答詔二月辛卯以前禮部郎中李翱爲廬州

刺史以求知制誥面數宰相李逢吉過故也辛丑江西

觀察使薛放卒癸卯以職方郎中知制誥王璠爲御史

中丞三月乙巳朔以兵部尚書郭釗爲梓州刺史劍南

東川節度使表丁未裴度守司空壬子宴羣臣於三殿戊辰夜有

流星長三丈出紫微入濁滅辛未以前桂管觀察使殷

侑爲江西觀察使上御宣政殿試制舉人二百九十一

人以中書舍人鄭涵吏部郎中崔瑄兵部郎中李虞仲

並充考制策官夏四月甲戌朔宰相涼國公李逢吉進封鄭國公以右神策大將軍康志睦檢校工部尚書兼青州刺史平盧軍節度使宣中書以諫議大夫劉栖楚爲刑部侍郎丞郎宣授自栖楚始也鄭涵等考定制舉人敕下後數日上謂宰相曰韋端符楊魯士皆涉物議宜與外官乃授端符白水尉魯士城固尉宰臣請其罪名不報癸巳羣臣上徽號曰文武大聖廣孝皇帝御宣政殿受冊禮畢御丹鳳樓大赦天下大辟罪已下無輕重咸赦除之賜文武官階勳爵時李紳貶官李逢吉惡紳不欲紳量移乃於赦書節文內但言左降官已經量移宜與

量移近處不言未量移者宜與量移翰林學士韋處厚
上疏論列云不可爲李紳一人與逢吉相惡遂令近年
流貶官皆不得量移則乖曠蕩之道也帝遽命追赦書
添改之己亥以劍南東川節度使檢校司空李絳爲左
僕射御史蕭徹彈京兆尹兼御史大夫崔元略違詔徵
畿內所放錢萬七千貫付三司勘鞫不虛辛丑敕削元
略兼御史大夫五月甲辰朔以前平盧軍節度使薛平
檢校左僕射兼戶部尚書賜振武軍錢一十四萬貫修
築東受降城庚戌幸魚藻宮觀競渡庚申正衙命使冊
九姓迴鶻登里囉汨沒密施合毗伽昭禮可汗丙寅太

子少傅致仕閻濟美卒丁卯湖南觀察使沈傳師奏當
道先配吐蕃羅沒等一十七人準赦放還本國今各得
狀不願還從之庚午以右金吾將軍李文悅爲豐州刺
史天德軍防禦使安南李元喜奏移都護府於江北岸
六月癸酉朔乙酉詔公主郡主並不得進女口丙戌將
作監張武均出爲洋州刺史坐贓犯也諸司白身馮志
謀等三百九人並賜綠丁亥命品官田務豐領國信十
二車賜迴鶻可汗及太和公主己丑河中節度使檢校
司空李愿卒乙未以檢校左僕射兼戶部尚書薛平檢
校司空河中尹河中節度使秋七月癸卯朔以忠武軍

節度使守司徒兼侍中李光顏爲太原尹北都留守河東節度使以堯海節度使王沛爲許州刺史忠武軍節度使熒惑犯右執法甲辰鹽鐵使王播進羨餘絹一百萬匹仍請日進二萬計五十日方畢播自掌鹽鐵以正入錢進奉以希罷固位託稱羨餘物議欲鳴鼓而攻之已酉鄜坊水壤廬舍癸丑以右金吾大將軍張茂宗爲堯海沂密節度使乙卯正衙命使冊司徒李光顏丙辰淄王傅分司元錫卒己未詔王播造競渡船二十隻供進仍以船材京內造時計其功當半年轉運之費諫議大夫張仲方切諫乃改進十隻辛酉萬年縣典賈鎮誣

告故統軍王佖男王謨等七人謀亂詔杖殺之甲子夜
月犯畢乙丑侍講學士崔郾高重進纂要十卷賜錦綵
二百匹丁卯以戶部侍郎韋顓爲吏部侍郎京兆尹崔
元略爲戶部侍郎奉天縣水壞廬舍辛未以左散騎常
侍胡証爲戶部尚書判度支太子賓客分司盧士攻卒
閏月壬申朔以權知工部侍郎鄭覃爲京兆尹甲申拾
遺李漢舒元褒薛廷老於閣內論曰伏見近日除授往
往不由中書進擬多是內中宣出臣恐紀綱寢壞姦邪
恣行伏希詳察上然之詔度支進銅三千觔金薄十萬
翻修清思院新殿及昇陽殿圖障丙戌戶部尚書致仕

裴堪卒戊子以給事中盧元輔爲工部侍郎壬辰以前
河東節度使李聽爲義成軍節度使戊戌以刑部尚書
段文昌爲兵部尚書依前判左丞事八月辛丑朔戊申
以鄆國公楊造男元湊襲鄆國公食邑三千戶兩京河
西大稔敕度支和糴折糴粟二百萬石乙卯夜太白近
房戊午遣中使往湖南江南等道及天台山採藥時有
道士劉從政者說以長生久視之道請於天下求訪異
人冀獲靈藥仍以從政爲光祿少卿號昇元先生九月
辛未朔丁丑衛尉卿劉遵古役人安再榮告前袁王府
長史武昭謀害宰相李逢吉詔三司鞠之壬午昭義軍

節度使劉悟卒

其子從諫自稱留後

癸未夜太白犯南斗丙戌夜

月犯右執法

新書天文志犯畢

丁酉華州暴水傷稼徐州王智

興奏大將武華等四百人謀亂並伏誅冬十月庚子朔

河南尹王起奏盜銷錢爲佛像者請以盜鑄錢論丁巳

振武節度使張惟清以東受降城濱河歲久雉堞摧壞

乃移置於綏遠峯南及是功成已未以崖州安置人嗣

郢王佐爲潁王府長史分司東都仍賜金紫壬戌

天文志癸

亥夜太白近哭星甲子三司鞠武昭獄得實武昭及弟

彙役人張少騰宜付京兆府決河陽節度掌書記李仲

言配流象州彙流崖州太學博士李涉流康州皆坐武

昭事也十一月庚午朔

裴實易直罷度支

辛未以御史中丞王

璠爲工部侍郎以諫議大夫獨孤朗爲御史中丞癸酉

天文志庚辰

鎮星近東井癸未以殿中少監嚴公素爲容管

經略使

案公素長慶元年已自經略留後除容管未嘗爲殿中少監也此疑代公素者

是夜月

犯東井庚寅車駕幸溫湯卽日還宮壬辰以刑部侍郎

劉栖楚爲京兆尹丙申詔封皇子普爲晉王丁酉吏部

侍郎韋顥卒十二月己亥朔辛丑以晉王普爲昭義軍

節度副

疑

大使以劉悟子將作監主簿從諫起復雲麾

將軍守金吾衛大將軍同正檢校左散騎常侍兼御史

大夫昭義軍節度留後戊申夜月犯畢其夜

五行志

北

方有霧起須臾徧天霧上有赤氣久而方散甲子以左
僕射李絳爲太子少師分司東都戊辰敕農功所切實
在耕牛疲暈多乏須議給賜委度支往河東振武靈夏
等州市耕牛一萬頭分給畿內貧下百姓是歲淮南浙
西宣襄鄂潭湖南等州旱傷稼

二年春正月己巳朔庚午湖南觀察使沈傳師奏奉詔
校尋葉靖能羅光遠文案檢尋不獲辛未貶殿中侍御
史王源植爲昭州司馬時源植街行爲教坊樂伎所侮
導從呵之遂成紛競京兆尹劉栖楚決責樂伎御史中
丞獨孤朗論之太切上怒遂貶源植癸酉右贊善大夫

李光現與品官李重實爭忿以笏擊重實流血上以宗屬罰兩月俸料甲戌以諸軍丁夫二萬人內穿池修殿辛巳興元節度使裴度奏修斜谷路及館驛皆畢功壬辰裴度來朝甲午以衛尉卿劉遵古爲湖南觀察使以國子祭酒衛中行爲福建觀察使丙申鹽鐵使王播奏揚州城內舊漕河水淺舟船澁滯輸不及期程今從闡門外古七里港開河向東屈曲取禪智寺橋東通舊官河計長一十九里其功役所費當使自方圓支遣從之二月己亥朔辛丑容管經略使嚴公素奏當州普寧等七縣請同廣昭桂賀四州例北選從之丙午夜月犯畢

丁未以山南西道節度觀察處置等使光祿大夫守司空同平章事興元尹上柱國晉國公裴度守司空同中書門下平章事復知政事丁巳寒食節三殿宴羣臣自戊午至庚申方止丙寅正衙冊司空裴度丁卯以禮部尚書王涯檢校左僕射山南西道節度使三月戊辰朔命興唐觀道士孫準入翰林待詔辛未江西觀察使殷侑請於洪州寶麻寺置僧尼戒壇敕殷侑故違制令擅置戒壇罰一季俸料甲戌賜宰臣百僚上巳宴於曲江亭乙亥右常侍李翱翱字疑譎卒戊寅幸魚藻宮觀競渡辛巳以同州刺史蕭俛爲太子少保分司壬午以工部尚

書裴武爲同州刺史癸未嶺南節度使崔植奏廣湖封
雷潘辨等七州戍軍除折衝別將外並請停從之丙戌
昆明夷遣使朝貢丁亥敕冊才人郭氏爲貴妃丙申以
吏部侍郎韋宏景爲陝虢觀察使夏四月戊戌朔橫海
軍節度使李全略卒

其子同
捷反

壬寅以右金吾衛大將軍

高承簡爲邠寧慶節度使丙午王廷湊檢校司空戊申
昭義軍節度留後劉從諫檢校工部尚書昭義軍節度
副大使知節度事庚戌鄂岳觀察當作節度使牛僧孺奏當
道沔州與鄂州隔江相對纔一里餘其州請併省其漢
陽汶川兩縣隸鄂州從之丙辰右金吾衛大將軍高霞

寓卒丙寅先是王廷湊請於當道立聖德碑是日內出
碑文賜廷湊五月戊辰朔上御宣和殿對內人親屬一
千二百人並於教坊賜食各頒錦綵辛未祕書省著作
郎韋公肅注太宗所撰帝範十二篇進特賜錦綵百匹
甲戌以涇原節度使楊元卿爲河陽三城懷州節度使
以金吾衛大將軍李岵爲涇原節度使是夜月近太微
星浙西送到絕粒女道士施子微戊寅幸魚藻宮觀競
渡庚辰中使自新羅取鷹鷄迴幽州軍亂殺其帥朱克
融及男延齡軍人立其第二子延嗣爲留後辛巳神策
軍苑內古長安城中修漢未央宮掘獲白玉牀一張長

六尺癸未山人杜景先於光順門進狀稱有道術令中使押杜景先往淮南及江南湖南嶺南諸州求訪異人甲申以尚書右丞丁公著爲兵部侍郎以前湖南觀察使沈傳師爲尚書右丞辛卯贈朱克融司徒甲午夜熒惑犯昴賜興唐觀道士劉從政修院錢二萬貫六月丁酉朔賜御史中丞獨孤朗金紫丁巳減放苑內役人二千五百帝性好土木自春至冬興作相繼庚申鄆州進驢打球人石定寬等四人是夜太白犯昴辛酉幸凝碧池令兵士千餘人於池中取大魚長大者送入新池癸亥以早命京城諸司疏理繫囚以延康坊官宅一區爲

諸王府司局甲子上御三殿觀兩軍教坊內園分明驢
鞠角觥酒酣有碎首折臂者至一更二更方罷秋七月
丙寅朔乙亥河中進力士八人癸未衡王絢薨癸巳敕
鄆縣漢陂尚食管係太倉廣運潭復賜司農寺八月丙
申朔以司空同平章事裴度判度支以工部侍郎王播
爲河南尹代王起以起爲吏部侍郎以前福州觀察使
徐晦爲工部侍郎是夜天文志
甲辰太白近太微令供奉道
士二十人隨浙西處士周息元入內宮之山亭院上問
以道術言識張果葉靜能浙西觀察使李德裕上疏言
息元誕妄無異於人庚戌以太府卿李憲爲江西觀察

使夜月犯輿鬼

天文志熒惑犯輿鬼

加京兆尹劉栖楚兼御史大

夫癸丑以太常卿崔從檢校吏部尚書判東都尚書省

事東都留守東畿汝都防禦使九月乙丑朔大合宴於

宣和殿陳百戲自甲戌至丙子方已戊寅河東節度使

守司徒兼侍中李光顏卒出內庫錢萬貫令內園召募

力士幽州監軍使奏都知兵馬使李再義與弟再寧同

殺朱延嗣并其家屬三百餘人推再義爲留後壬申

新書

紀表皆壬午

宰相李程爲北都留守河東節度使敕戶部所

管同州長春宮莊宅宜令內莊宅使管係冬十月乙未

朔己亥以幽州衙前都知兵馬使李再義檢校戶部尚

書盧龍軍節度副大使知節度事仍賜名載義壬戌以
中書舍人崔郾爲禮部侍郎十一月甲子朔以太清宮
道士趙歸真充兩街道門都教授博士帝好深夜自捕
狐狸宮中謂之打夜狐中官許遂振李少端魚志宏以
侍從不及削職壬申以戶部尚書胡証檢校兵部尚書
兼廣州刺史嶺南節度使甲申以右僕射同平章事李
逢吉檢校司空同平章事兼襄州刺史山南東道節度
使臨漢監牧使乙酉同州刺史裴武卒己丑詔朝官及
方鎮人家不得置私白身癸巳以前東都留守楊於陵
爲太子少傅中官李奉義王惟直成守貞各杖三十分

配諸陵宣徽使閻宏約副使劉宏逸各杖二十十二月
甲午朔辛丑帝夜獵還宮與中官劉克明田務成許文
端打球軍將蘇佐明王嘉憲石定寬等二十八人飲酒
帝方酣入室更衣殿上燭忽滅劉克明等同謀害帝卽
時殂於室內時年十八羣臣上諡曰睿武昭愍孝皇帝
廟號敬宗大和元年七月十三日葬於莊陵

史臣曰古人謂堯無子舜無父言其賢不肖之相遠也
以文惠驕誕之性繼之以昭愍固其宜也而昭獻昭肅
英特不羣文足以緯邦家武足以平禍亂三子之操行
頓異其何道哉寶祿不君國統幾絕天未降喪幸賴裴

度復任弼諧彼狡童兮夫何足議

文宗上

文宗元聖昭獻孝皇帝諱昂穆宗第二子母曰貞獻皇后蕭氏元和四年十月十日生長慶元年封江王初名涵寶厯二年十二月八日敬宗遇害賊蘇佐明等矯制立絳王勾當軍國事樞密使王守澄楊承和中尉梁守謙

魏從簡率禁軍討賊誅絳王迎上於江邸癸卯見宰臣於

閣內下教處分軍國事甲辰僧惟真齊賢正簡道士趙歸真並配流嶺南擊球軍將于登等六人令本軍處置宰臣百僚三上表勸進乙巳卽位於宣政殿丙午上赴

西宮成服丁未宰臣百僚上表請聽政三表許之道士
紀處元楊冲虚伎術人李元戢王信等並配流嶺南戊
申尊聖母爲皇太后己酉敕鳳翔淮南先進女樂二十
四人並放歸本道庚戌以正議大夫兵部侍郎知制誥
充翰林學士柱國賜紫金魚袋韋處厚爲中書侍郎同
中書門下平章事以翰林學士路隨承旨侍講學士宋
申錫充書詔學士丙辰以山南東道節度使柳公綽爲
刑部尚書丁巳爲絳王舉哀廢朝三日庚申詔君天下
者莫尚乎崇澹泊子困窮遵道以端本推誠而達下故
聖祖之誠以慈儉爲寶大易明訓垂簡易之文未有上

約而下不豐欲寡而求不給朕以眇薄遭逢內難刷君
父之讐恥據億兆之哀寃而股肱大臣羣卿庶士引義
抗請至於再三以圖宗社之安以答華夷之望俯從衆
欲夙夜震兢思所以克已復禮修政安人宵興匪寧旰
食勞慮夫儉過則酌之以禮文勝則矯之以質庶乎俗
登太古道洽生靈儀刑家邦以化天下內庭官人非職
掌者放三千人任從所適長春宮斛斗諸物依前戶部
收管鄆縣漢陂鳳翔府駱谷地還府縣教坊樂官翰林
待詔伎術官并總監諸色職掌內冗員者共一千二百
七十人並宜停廢總監中一百二十四人先屬諸軍並

各歸本司餘七百三人勒納牒身放歸本管先供教坊衣糧一百分廂家及諸司新加衣糧三千分並宜停給五坊鷹鷂並解放今年新宣附食度支衣糧小兒一百人並停給別詔宣纂組雕鏤不在常貢內者並停度支鹽鐵戶部及州府百司應供官禁年支一物已上並準貞元元額爲定先造供禁中牀榻以金筐瑟瑟寶鈿者悉宜停造東頭御馬坊球場宜却還龍武軍其殿及亭子所司毀拆餘舍賜本軍應行從處張陳不得用花蠟結綵華飾今年已來諸道所進音聲女人各賜束帛放還城外墳墓先有開斷以備行幸處宜曉示百姓任其

修塞其大逆魁首蘇佐明等二十八人並已處斬宗族
籍沒妖妄僧惟貞道士趙歸真等或假於卜筮或託以
醫方疑衆挾邪已從流竄其情非姦惡迹涉誣誤者一
切不問兇徒旣殄寰宇佇康載舉令猷用宏庶績布告
中外知朕意焉帝在藩邸知兩朝之積弊此時釐革並
出宸衷士民相慶喜治道之復興矣

裴度爲門下侍郎
賈易直爲尚書

右僕射

壬戌以前江西觀察使殷侑爲大理卿

大和元年春正月癸亥朔庚午以御史中丞獨孤朗爲
戶部侍郎以兵部尚書權判左丞事段文昌爲御史大
夫是夜月掩畢大星戊寅以左散騎常侍李益爲禮部

尚書致仕以京兆尹劉栖楚爲桂管觀察使以前戶部

侍郎于敖爲宣歙觀察使代崔羣以羣爲兵部尚書癸

未以吏部侍郎庾承宣爲京兆尹兼御史大夫

表天平軍節度

使烏重胤守司徒

二月丙申復置兩輔六雄十望十緊三十四

州別駕其諸色在京及內外諸軍使等職事並不在挾

名限已亥以右散騎常侍集賢殿學士判院事張正甫

爲工部尚書辛丑以前廣州節度使崔植爲戶部尚書

以太子少師分司東都李絳檢校司空兼太常卿乙巳

御丹鳳樓大赦改元大和

免京兆今歲夏稅半賜九廟陪位者子孫二階立功將士

階爵始封諸王後子一子出身

甲寅敕諸道節度觀察使去任日宜具

交割狀仍限新使到任一月分析聞奏以憑殿最丙辰

以華州刺史錢徽爲尚書右

本傳左

丞以前河陽節度使

崔宏禮爲華州鎮國軍使己未以太子少保分司蕭悅
檢校右僕射兼禮部尚書庚申以虔州刺史韓約爲安
南都護三月壬戌朔右軍中尉梁守謙請致仕以樞密
使王守澄代之戊寅以前蘇州刺史白居易爲祕書監
仍賜金紫壬午幽州李載義奏故張宏靖判官家屬凡
一百九十人並送赴闕夏四月壬辰朔癸巳以太子少
傅楊於陵守右僕射致仕俸料全給甲午鳳翔築臨泝
城於泝陽縣西北八十里壬寅毀昇陽殿東放鴨亭戊

申毀望仙門側看樓十間並敬宗所造也以前亳州刺史張遵爲邕管經略使乙卯以禮部尚書蕭俛爲太子少師分司己未忠武軍節度使王沛卒庚申以太僕卿

高瑀檢校左散騎常侍忠武軍節度使己巳

案是月無己巳誤

貶山南東道節度副使李續爲涪州刺史行軍司馬張又新汀州刺史李逢吉黨也五月壬戌朔戊辰詔元首股肱君臣象類義深同體理在坦懷夫任則不疑疑則不任然自魏晉已降參用霸制虛儀搜索因習尚存朕方推表大信置人心腹庶使諸侯方岳鼓洽道化夷貊飛走暢泳治功况吾台宰又何間焉自今已後紫宸坐

朝衆僚旣退宰臣復進奏事其監搜宜停丙子以天平

軍節度使守司徒同平章事烏重胤爲橫海軍節度使

討李同捷以前攝橫海軍節度副使檢校國子祭酒侍御史

李同捷檢校左散騎常侍兼兗州刺史兗海沂密節度

使加魏博史憲誠同平章事甲申淮南節度鹽鐵轉運

等使王播來朝丙戌夜熒惑犯右執法六月辛卯朔敕

文武常參官朝參不到據料錢多少每貫罰二十五文

癸巳以淮南節度副大使知節度事管內營田觀察處

置臨漢監牧等使兼諸道鹽鐵轉運等使銀青光祿大

夫檢校司空同平章事揚州長史上柱國太原縣開國

伯食邑七百戶王播可尚書左僕射同中書門下平章

事依前充諸道鹽鐵轉運使以御史大夫段文昌代播
爲淮南節度使丙申左司郎中兼侍御史知雜溫造權
知御史中丞癸卯詔元和長慶中皆因用兵權以濟事
所下制敕難以通行宜令尚書省取元和已來制敕參
詳刪定訖送中書門下議定聞奏甲寅新書乙卯以旱放繫

囚秋七月辛酉朔癸亥太常卿李絳進封趙國公李同
捷除兗海不受詔結幽鎮謀叛癸酉葬敬宗於莊陵辛
巳敕今年權於東都置舉徐州王智興請全軍討李同
捷八月庚寅朔以工部侍郎獨孤朗爲福建觀察使以

太府卿裴宏泰爲黔中經略觀察使左僕射致仕楊於陵讓全給俸料許之庚子詔削奪李同捷在身官爵復以張茂宗爲兗海沂密節度使辛丑邠寧節度使高承簡卒壬寅以刑部尚書柳公綽檢校左僕射邠寧節度使戊申以諫議大夫張仲方爲福建觀察使癸丑前福建觀察使獨孤朗卒九月庚申朔癸亥以左神策將軍何文哲爲鄜坊丹延節度使甲戌以左神策大將軍李沐爲單于都護振武麟勝節度使丁丑浙西觀察使李德裕浙東觀察使元稹並加檢校禮部尚書壬午桂管觀察使劉栖楚卒丙戌以諫議大夫蕭祐爲桂管觀察

使癸丑

案是月無癸丑誤或
癸丑上缺十月字

兗州復置萊蕪縣冬十一

月己未朔丙寅河中薛平奏虞鄉縣有白虎入靈峯觀

天平橫海等軍節度使守司徒同平章事烏重胤卒

表

度罷
度支

庚辰以保義軍節度晉慈觀察使李寰爲橫海軍

節度使

討李
同捷

癸巳以晉州慈州復隸河中以尚書左丞

錢徽爲華州鎮國軍使丁酉右金吾衛大將軍王公亮

爲湖南觀察使

十一月庚戌王智興
爲滄州行營招撫使

二年春正月戊午朔壬申

地震

以右散騎常侍孔戢爲京

兆尹二月丁亥朔以兵部侍郎王起爲陝虢觀察使代

韋宏景以宏景爲尚書左丞乙巳以刑部侍郎盧元輔

爲兵部侍郎祕書監白居易爲刑部侍郎庚戌敕李絳
所進則天太后刪定兆人本業三卷宜令所在州縣寫
本散配鄉村三月丁巳朔度支奏京兆府奉先縣界鹵
池側近百姓取水栢柴燒灰煎鹽每一石灰得鹽一十
二觔一兩亂法甚於鹹土請行禁絕今後犯者據灰計
鹽一如兩池鹽法條例科斷從之辛巳上御宣政殿親
試制策舉人以左散騎常侍馮宿太常少卿賈餗庫部
郎中龐嚴爲考制策官閏月丙戌朔內出水車樣令京
兆府造水車散給緣鄭白渠百姓以溉水田夏四月丙
辰朔壬午以邕管經略使王茂元爲容管經略使五月

乙酉朔丁亥命中使於漢陽公主及諸公主第宣旨令
後每遇對日不得廣挿釵梳不須著短窄衣服乙未以
吏部侍郎丁公著爲禮部尚書庚子敕應諸道進奉內
庫四節及降誕進奉金花銀器并纂組文纈雜物並折
充銚銀及綾絹其中有賜與所須待五年後續有進止
帝性恭儉惡侈靡庶人務敦本故有是詔帝與侍講學
士許康佐語及取蚺蛇膽生剖其腹爲之惻然乃詔度
支曰每年供進蚺蛇膽四兩桂州一兩賀州二兩泉州
一兩宜於數內減三兩桂賀泉三州輪次歲貢一兩帝
自撰集尚書中君臣事迹命畫工圖於太液亭朝夕觀

覽焉王廷湊出兵侵鄰藩欲撓王師以援李同捷昭義

劉從諫請出軍討之六月乙卯朔晉王普薨贈爲悼懷

太子陳州水害秋稼癸亥四方館請賜印其文以中書

省四方館爲名己巳大風拔木辛酉辛酉上下以吏部

尚書鄭綱爲太子少保乙亥峯州刺史辛巳以靈武節

度使李進誠爲邠寧節度使以天德軍使李文悅爲靈

武節度使是夏河溢壞棣秋七月乙酉以前邠寧節度

使柳公綽檢校左僕射兼刑部尚書辛丑魏博節度使

戰於平原敗之甲辰詔宰臣集三署四品已上常參官議討王

廷湊可否是夜彗西出攝提南長二尺八月甲寅朔丁

已以兵部侍郎盧元輔爲華州鎮國軍使以代錢徽以

徽爲吏部尚書致仕壬戌京畿奉先等十七縣水已

湊反壬申義武軍節度使柳公濟及庭湊戰於新樂敗

之已卯劉從諫又敗之於臨城辛巳史憲誠及李同捷

戰於平原敗之癸未劉從諫及王庭湊戰於昭慶敗之

九月甲申朔丁亥王智興拔棣州以新除橫海軍節度使李寰爲夏州節度使甲

午詔削奪王庭湊在身官爵鄰道接界隨便進討表武

節度使王智興與守司徒以前夏州節度使傅良弼爲橫海軍節度

使癸卯柳公濟又敗王庭湊於博野丁未岳王緄薨庚戌安南軍亂逐都護韓

約冬十月癸丑朔丁巳罷揚州海陵監牧以戶部尚書

崔植爲華州鎮國軍使庚申史憲誠及李同捷戰於平原敗之丙寅嶺南

節度使胡証卒

丁卯洋王忻薨

辛未以江西觀察使李憲爲嶺

南節度使癸酉以右僕射同平章事實易直檢校左僕

射同平章事山南東道節度臨漢監牧等使代李逢吉

以逢吉爲宣武軍節度使代令狐楚以楚爲戶部尚書

以尚書右丞沈傳師爲江西觀察使

戊寅史憲誠及李同捷戰於平原敗

之已卯以河南尹王璠爲尚書右丞以左散騎常侍馮

宿爲河南尹

壬午幽州盧龍軍節度使李載義又敗同捷於長蘆

十一月癸未朔

乙酉以右金吾衛大將軍李祐爲橫海軍節度使新除

傅良弼赴鎮卒於陝州故也

壬辰給復棣州一年稟戰士創廢者終身

甲辰

禁中已時昭德寺火直宣政殿之東至午未間北風起

火勢益甚至暮稍息十二月壬子朔乙丑魏博行營都

知兵馬使元志紹

新書作紹

率所部兵馬二萬餘人謀叛欲

殺史憲誠父子壬申中書侍郎同平章事韋處厚暴卒
戊寅詔以兵部侍郎知制誥翰林學士路隨爲中書侍
郎同中書門下平章事

三年春正月壬午朔丙戌元志紹率兵迴據永濟縣其
衆分散入諸縣邑史憲誠告難詔滄州行營兵士赴之
丁亥京兆尹孔戢卒庚寅吏部尚書致仕錢徽卒庚子
李聽殺敗元志紹兵志紹北走鎮州甲辰以太常卿李
絳檢校司空兼興元尹山南西道節度使華州鎮國軍

使崔植卒己酉以前山南西道節度使王涯爲太常卿

二月辛亥朔以兵部尚書崔羣爲荆南節度使甲寅荆

南節度使王潛卒三月辛巳朔以戶部尚書令狐楚爲

東都留守乙酉敕兵戈未息教坊每日祇候樂人宜權

停壬辰易定節度使柳公濟卒以前東都留守崔從爲

戶部尚書乙巳以太原兵馬使傅毅爲義武軍節度使

使戊申以璠爲義武軍節度使夏四月戊辰滄景節度使李祐克德州李同捷降庚午王智

興奏部下將石雄搖扇軍情請行朝典乃長流白州五

月己卯朔甲申栢耆斬李同捷於將陵新書在四月乙亥滄景

平李祐入滄州丁亥御興安樓受滄州所獻李祐送李

同捷母妻及男元達等赴闕詔並宥之令於湖南安置
貶滄德宣慰使諫議大夫栢耆循州司戶宣慰判官殿
中侍御史沈亞之虔州南康尉以擅入滄州取李同捷
諸鎮所怒奏論之也

辛卯給復滄景
德棣四州一年

丙申橫海軍節度

使李祐卒以涇原節度使李岵爲齊德節度使改名有
裕丁酉以前義武軍節度使傅毅爲滄州刺史橫海軍
節度使辛丑以右金吾衛大將軍張惟清檢校司空涇
原節度使以左金吾衛大將軍劉遵古爲邠寧節度使
六月己酉朔辛亥以魏博節度使史憲誠檢校司徒兼
侍中河中尹河中晉絳節度使以義成軍節度使李聽

爲魏博節度使以魏博節度副使檢校工部尚書史孝
章爲相衛節度使壬申敕元和四年敕禁鉛錫錢皆納
官許人糾告一錢賞百錢此爲太過此後以鉛錫錢交
易者一貫以下州府常行杖決脊杖二十十貫以下決
六十徒三年過十貫已上集衆決殺能糾告者一貫賞
錢五十文甲戌魏博軍亂殺其節度使史憲
誠都知兵馬使何進滔自稱留後秋七月己
卯朔癸未中使劉宏逸送史憲誠旌節自魏州還稱六
月二十六日夜魏博軍亂殺史憲誠立大將何進滔爲
留後其新節度使李聽入城不得已丑河中節度使薛
平依前河中節度使乙未嶺南節度使李憲卒兵部侍

郎盧元輔卒丁酉以京兆尹崔護爲御史大夫嶺南節
度使戊戌以大理卿李諒爲京兆尹乙巳以禮部尚書
翰林侍講學士丁公著檢校工部尚書兼潤州刺史浙
西觀察使以前浙西觀察使李德裕爲兵部侍郎八月
辛亥魏博何進滔奏準詔割相衛二州三軍不受壬子
詔以魏博衙內都知兵馬使何進滔檢校左散騎常侍
魏博節度使癸丑以衛尉卿殷侑檢校工部尚書齊德
滄節度使辛酉京畿奉先等九縣旱損田免今播州流
歲稅人衛中行卒宋亳水害稼壬申詔雪王廷湊復官爵甲
戌以吏部侍郎李宗閔同中書門下平章事九月戊寅

朔辛已敕兩軍諸司內官不得著紗縠綾羅等衣服帝
性儉素不喜華侈駙馬韋處仁戴夾羅巾帝謂之曰比
慕卿門地清素以之選尚如此巾服從他諸戚爲之唯
卿非所宜也壬辰以兵部侍郎李德裕檢校戶部尚書
兼滑州刺史義成軍節度使戊戌以前睦州刺史陸亘
爲越州刺史浙東觀察使代元稹以稹爲尚書左丞代
韋宏景以宏景爲禮部尚書冬十月戊申朔己酉江西
沈傳師奏皇帝誕月請爲僧尼起方等戒壇詔曰不度
僧尼累有敕命傳師忝爲藩守合奉詔條誘致愚妄庸
非禮道宜罰一月俸料

癸卯仗
丙辰以前義成軍節度

丙辰以前義成軍節度

使李聽爲太子少師癸亥以戶部侍郎崔元略爲戶部

尚書判度支以中書舍人韋辭爲湖南觀察使十一月

丁丑朔庚辰太子太傅鄭綱卒丙戌敕前亳州刺史李

繁於京兆府賜死壬辰朝獻於太清宮
癸巳朝享於太廟甲午帝親祀昊

天上帝於南郊禮畢御丹鳳樓大赦節文禁止奇貢云

四方不得以新樣織成非常之物爲獻機杼織麗若花

絲布繚綾之類並宜禁斷敕到一月機杼一切焚棄刺

史分憂得以專達事有違法觀察使然後奏聞丙申西

川奏南詔蠻入寇昭善邛
二州甲辰王智興來朝乙巳以智

興守太傅依前同平章事武寧軍節度使進封雁門郡

王十二月丁未朔南蠻逼戎州遣使起荆南鄂岳襄鄧
陳許等道兵赴援蜀川以劍南東川節度使郭釗爲西
川節度使仍權東川事王子貶劍南西川節度使杜元
穎爲韶州刺史遣中使楊文端齎詔賜南蠻王蒙豐佑
蠻軍陷邛雅等州戊午以右領軍衛大將軍董重質充
神策西川行營都知兵馬使西川奏蠻軍陷成都府東
川奏蠻軍入梓州西郭門下營又詔促諸鎮兵救援西
川乙丑以東都留守令狐楚檢校右僕射天平軍節度
使代崔宏禮以宏禮爲東都留守丁卯貶杜元穎循州
司馬己巳郭釗奏蠻軍抽退遣使賜蠻帥蒙筭巔國信

辛未以太子少師李聽爲邠寧節度使癸酉以御史中丞
丞溫造爲尚書右丞吏部郎中宇文鼎爲御史中丞

唐書卷第十七

唐書卷第十八

本紀十八

文宗下

大和四年春正月丙子朔辛巳武昌軍節度使牛僧孺
來朝丙戌以左神策軍大將軍邱直方爲鄜坊節度使
戊子詔封長男永爲魯王辛卯以武昌軍節度鄂岳蘄
黃安申觀察處置等使金紫光祿大夫檢校吏部尚書
同平章事上柱國竒章郡開國公牛僧孺爲兵部尚書
同中書門下平章事壬辰以兵部侍郎崔郾爲陝虢觀
察使封魯王母王氏爲昭儀癸巳以前邠寧節度使劉
遵古爲劍南東川節度使甲午守左僕射同平章事諸

道鹽鐵轉運使王播卒丙申以太常卿王涯爲吏部尚書充諸道鹽鐵轉運使辛丑以尚書左丞元稹檢校戶部尚書武昌軍節度使鄂岳蘄黃安申等州觀察使癸卯以前陝虢觀察使王起爲尚書左丞二月丙午朔戊午新書興元軍亂節度使李絳舉家被害判官薛齊趙存約死之庚申以尚書右丞溫造爲興元尹山南西道節度使辛未夏州節度使李寔卒壬申以神策行營節度使董重質爲夏綏銀宥節度使三月乙亥以河東節度使李程檢校左僕射同平章事兼河中尹河中晉絳慈隰節度使以刑部尚書柳公綽檢校左僕射太原尹

北都留守河東節度使丁丑以前河中節度使薛平爲
太子太保丁亥以衛尉卿桂仲武爲福建觀察使興元
溫造奏害李絳賊首邱崑邱鑄及官健千人並處斬訖
其親刃絳者斬一百段號令者三段餘並斬首內一百
首祭李絳三十首祭死王事官僚其餘屍首並投於漢
江已丑詔興元監軍使楊叔元宜配流康州百姓錮身
遞於配所丁酉監修國史中書侍郎同平章事路隨進
所撰憲宗實錄四十卷優詔答之賜史官等五人錦繡
銀器有差癸卯以淮南節度使段文昌檢校左僕射同
平章事兼江陵尹荆南節度使以前太子賓客崔從檢

校右僕射揚州長史淮南節度使

禁京畿
弋獵

甲辰以前荆

南節度使崔羣檢校右僕射兼太常卿以中書舍人李

虞仲爲華州鎮國軍使代嚴休復以休復爲右散騎常

侍夏四月乙巳朔丙午以右散騎常侍翰林侍講學士

鄭覃爲工部尚書丁未兵部尚書致仕張賈卒

奚寇邊
李載義

之敗丁巳貶前齊德滄景節度使李有裕爲永州刺史馳

驛赴任庚申以尚書左丞王起爲戶部尚書判度支代

崔元畧以元畧檢校吏部尚書東都留守辛酉

新書天
文志庚

申夜月掩南斗第二星壬戌詔曰儉以足用令出惟行

著在前經斯爲理本朕自臨四海愍元元之久困日昃

忘食宵興疚懷雖絕文繡之飾尚愧茅茨之儉亦諭卿士形於詔條如聞積習流弊餘風未革車服第室相高以華靡之制資用貨寶固啟於貪冒之原有司不禁侈俗滋扇蓋朕教導之未敷使兆庶昧於恥讓也其何以足用行令臻於致理歟永念慙歎迨茲申敕自今內外班列職位之士各務素樸宏茲國風有僭差尤甚者御史糾上主者宣示中外知朕意焉文宗承長慶寶厯奢靡之風銳意懲革躬行儉素以率厲之辛未以前東都留守崔宏禮爲刑部尚書鎮州王廷湊請修建初啟運二陵從之五月甲戌朔丁丑以早命京城諸司疏理繫

囚已卯通化南北二門鎖不可開鑰入如有持之者上
令鐵工破鎖時日已及辰矣丁亥改鄆州東平縣爲天
平縣戊子敕度支每歲於西川織造綾羅錦八千一百
六十七疋令數內減二千五百疋六月癸卯朔丁未
以守司空門下侍郎同平章事上柱國晉國公食邑三
千戶食實封三百戶裴度爲守司徒平章軍國重事待
疾損日每三日五日一度入中書裴已酉路隨爲門下
侍郎李宗閔爲中書
侍郎已巳檢校司徒平
章事李載義守太保 辛未夜自一更至五更大小星
流旁午觀者不能數壬申詔如聞諸司刑獄例多停滯
委尚書左右丞及監察御史糾舉以聞秋七月癸酉朔

癸未詔以朝議郎尚書右丞上柱國賜紫金魚袋宋申

錫爲正議大夫行尚書右

新書表左

丞同中書門下平章事

乙酉敕前行郎中知制誥者約滿一周年卽與正授從

諫議大夫知者亦宜準此餘依長慶二年七月二十七

日敕處分振武置雲伽關加鎮兵千人以吏部侍郎王

璠爲京兆尹兼御史大夫代李諒以諒爲桂管觀察使

太原饑賑粟三萬石賜十六宅諸王綾絹二萬疋丁酉

守司徒裴度上表辭冊命言臣此官已三度受冊有覲

面目從之八月壬寅朔丙寅鄜州水溺居民三百餘家

太原柳公綽奏雲代蔚三州山谷間石化爲麪人取食

之己未宣歙觀察使于敖卒甲子內出綾絹三十萬疋
付戶部充和糴戊辰幸梨園亭會昌殿奏新樂九月壬
申朔丁丑以大理卿裴誼檢校右散騎常侍江西觀察
使代沈傳師以傳師爲宣歙觀察使內出綾三千疋賜
宥州築城兵士戊寅舒州太湖宿松望江三縣水溺民
戶六百八十詔以義倉賑貸庚辰吏部尙書王涯爲右
僕射依前鹽鐵轉運使壬午以守司徒平章軍國重事
晉國公裴度守司徒兼侍中山南東道節度使以投來
奚王茹羯爲右驍衛將軍同正丙戌以前山南東道節
度使竇易直爲左僕射戊子吏部尙書致仕裴向卒己

丑淮南天長等七縣水害稼丁酉前豐州刺史天德軍使渾鍼坐贓七千貫貶袁州司馬冬十月壬寅朔戊申以東都留守崔元畧檢校吏部尙書兼滑州刺史義成軍節度使代李德裕以德裕檢校兵部尙書兼成都尹劍南西川節度使已酉京師有熊入莊嚴寺庚戌以前刑部尙書崔宏禮爲東都留守甲寅以前劍南西川節度使檢校司空郭釗爲太常卿代崔羣以羣爲吏部尙書丁卯御史中丞宇文鼎奏今月十三日宰臣宣旨今後羣臣延英奏事前一日進狀入來者臣以尋常公事不暇面論但見表章足以陳露儻臨時忽有公務文字

不足盡言則咫尺天聽無路聞達更俟後坐動踰數辰
處置之間便不及伏乞重賜宣示限以狀入者並在
卯前如在卯後聽不收覽自然人各遵守禮亦得中從
之十一月辛未朔是夜熒惑近左

天文志右

執法癸巳以尙

書左丞庾承宣爲兗海沂密節度使淮南大水及蟲霜
並傷稼十二月辛丑朔滄州殷侑請廢景州爲景平縣
己酉義成軍節度使崔元畧卒壬子以左金吾衛大將
軍段嶷爲義成軍節度使癸丑湖南觀察使韋辭卒丙
辰以工部侍郎崔瑄爲京兆尹代王璠以璠爲尙書左
丞癸亥東都留守崔宏禮卒以同州刺史高重爲潭州

刺史兼御史中丞湖南觀察使甲子左僕射致仕楊於陵卒贈司空丙寅以前河南尹馮宿爲工部侍郎戊辰以太子賓客分司白居易爲河南尹以代韋宏景以宏景守刑部尙書東都留守閏月辛未朔壬申太常卿郭釗卒贈司徒壬辰廢齊州歸化縣地入臨邑縣廢景州其縣隸滄州是歲京畿河南江南荆襄鄂岳湖南大水害稼出官米賑給

五年春正月庚子朔以積陰浹旬罷元會丁巳賜滄德節度使曰義昌軍太原旱賑粟十萬石己未詔方鎮節度觀察使請入覲者先上表奏聞候允則任進程庚申

幽州軍亂逐其帥李載義

殺莫州刺史張慶初

立後院副兵馬使

楊志誠爲留後癸亥詔端午節辰方鎮例有進奉其雜綵正段許進生白綾絹乙丑以權知渤海國務大彝震檢校祕書監忽汗州都督渤海國王二月庚午朔壬辰以盧龍軍節度使守太保同平章事李載義守太保同中書門下平章事時載義失守入朝賜第於永寧里給賜優厚丙申以桂管觀察使李諒爲嶺南節度使戊戌神策中尉王守澄奏得軍虞候豆盧著狀告宰相宋申錫與漳王謀反卽令追捕三月庚子詔貶宋申錫爲太子右庶子壬寅左常侍崔元亮及諫官等十四人伏奏

玉階北軍所告事請不於內中鞫問乞付法司帝曰吾
已謀於公卿矣卿等且退元亮泣涕陳諫久之帝改容
勞之曰朕卽與宰臣商議元亮等方退癸卯詔漳王濩
可降爲巢縣公左庶子宋申錫開州司馬同正初京師
惻惻以宰相實聯親王謀逆三四日後方知誣構人士
側目於守澄鄭注故諫官號泣論之申錫方免其禍已
酉敕以李載義入朝於曲江亭賜宴仍命宰臣百僚赴
會辛酉以黔中觀察使裴宏泰爲桂管經畧使以前安
州刺史陳正儀爲黔中觀察使裴乙丑牛僧孺丁卯紫
宸奏事宰相路隨至龍墀身什於地令中人掖之翼日

上疏陳退識者嘉之夏四月己巳朔甲戌以新羅王嗣子金景徽爲開府儀同三司檢校太保使持節雞林州諸軍事雞林州大都督寧海軍使上柱國封新羅王仍封其母朴氏爲新羅國太妃丁亥詔史官記事用戒時君先朝舊制並得隨仗其後宰臣撰時政記因循斯久廢墜實多自今後宰臣奏事有關獻替及臨時處分稍涉政刑者委中書門下丞一人隨時撰錄每季送史館庶警朕闕且復官常己丑以李載義爲山南西道節度使依前守太保同平章事代溫造以造爲兵部侍郎以幽州盧龍軍節度留後楊志誠檢校工部尙書幽州盧

龍軍節度使五月戊戌朔太廟第四室第六室破漏有司不時修葺各罰俸上命中使領工徒及以禁中修營材葺之右補闕韋溫上疏論曰宗廟不葺罪在有司弛慢宜加重責今有司止於罰俸便委內臣修葺是許百司之官公然廢職以宗廟之重爲陛下所私則羣官有苟非舊典不可率然伏乞更下詔書復委所司營葺則制度不紊官業各修矣疏奏帝嘉之乃追止中使命有司修奉戊午西川李德裕奏南蠻放還先虜掠百姓工巧僧道約四千人還本道辛酉東都留守刑部尙書韋

宏景卒丙寅以京兆尹崔瑄爲尙書左丞太常少卿龐
嚴權知京兆尹六月丁卯朔戊寅以霖雨涉旬詔疏理
諸司繫囚辛卯蘇杭湖南水害稼甲午東川奏元武江
水漲二丈入梓州羅城漂人廬舍秋七月丁酉朔庚子
贈太子賓客李渤禮部尙書辛丑以兵部侍郎溫造檢
校戶部尙書東都留守甲辰以太子少師上柱國襲徐
國公蕭俛守左僕射致仕劍南東西兩川水遣使宣撫
賑給己未以給事中羅讓爲福建觀察使八月丙寅朔
庚午武昌軍節度使檢校戶部尙書元稹卒辛未貶刑
部員外郎舒元輿爲著作郎元輿累上表請自效并進

文章朝議責其躁進也壬申以河陽三城節度使楊元卿爲宣武軍節度使代李逢吉以逢吉檢校司徒兼太子太師東都留守代溫造以造爲河陽三城懷州節度使戊寅以陝虢觀察使崔郾爲鄂岳安黃觀察使甲申以中書舍人崔咸爲陝州防禦使詔陝州舊有都防禦觀察使額宜停兵馬屬本州防禦使丙戌京兆尹龐嚴卒庚寅以司農卿駙馬都尉杜悰爲京兆尹九月丙申朔甲辰貶太子左庶子郭求爲婺王府司馬以其心疾與同僚忿競也翰林學士薛廷老李讓夷皆罷職守本官廷老在翰林終日酣醉無儀檢故罷讓夷常推薦廷

老故坐累也已未以左僕射竇易直判太常卿西川李
德裕奏收復吐蕃所陷維州差兵鎮守冬十月乙丑朔
以前綿州刺史鄭綽爲安南都護戊寅蠻寇鶴州陷二
縣辛巳滄州移清池縣於南羅城內置十一月乙未朔
庚戌鳳翔節度使王承元來朝己未以承元檢校司空
青州刺史平盧軍節度使癸亥以左僕射判太常卿事
竇易直檢校司空鳳翔尹鳳翔隴右節度使十二月乙
丑朔戊寅以尙書左丞王璠兼判太常卿事甲申貶新
除桂管觀察使裴宏泰爲饒州刺史以除鎮淹程不進
爲憲司所糾故也癸巳以鄭州刺史李翱爲桂管觀察

使是歲淮南浙江東西道荆襄鄂岳劍南東川並水害
稼請蠲秋租是冬京師大雨雪

六年春正月乙未朔以久雪廢元會戊戌振武李泳招
收得黑山外契苾部落四百七十三帳王子詔朕聞天
聽自我人聽天視自我人視朕之菲德涉道未明不能
調序四時導迎和氣自去冬已來踰月雨雪寒風尤甚
頗傷於和念茲庶甿或罹凍餒無所假貸莫能自存中
宵載懷旰食與歎怵惕若厲時予之辜思宏惠澤以順
時令天下死罪囚除官典犯贓故意殺人外并降徒流
流已下遞降一等應京畿諸縣宜令以常平義倉斛斗

賑恤京城內鰥寡癯殘無告不能自存者委京兆尹量
事濟恤具數奏聞言念赤子視之如傷天或警予示此
陰沴撫躬夕惕予甚悼焉羣臣拜表上徽號甲寅司徒
致仕薛平卒二月甲子朔

蘇州地震
生白毛

以前義昌軍節度

使殷侑檢校吏部尙書天平軍節度鄆曹濮觀察等使
代令狐楚以楚檢校右僕射兼太原尹北都留守河東
節度使戊寅蘇湖二州水賑米二十二萬石以本州常
平義倉斛斗給庚辰戶部尙書判度支王起請於邠寧
靈武置營田務從之己丑寒食節上宴羣臣於麟德殿
是日雜戲人弄孔子帝曰孔子古今之師安得侮瀆亟

命驅出三月甲午朔辛丑以武寧軍節度使守太傅同
平章事王智興兼侍中忠武軍節度陳許蔡觀察等使
以邠寧節度使李聽爲武寧軍節度徐泗濠觀察等使
以金吾衛大將軍孟友亮爲邠寧節度使以前河東節
度使柳公綽爲兵部尚書辛酉以前忠武軍節度使高
瑀檢校右僕射武寧軍節度徐泗濠觀察等使夏四月
癸亥朔乙丑兵部尚書柳公綽卒戊寅以新除武寧軍
節度使李聽爲太子太保五月癸巳朔甲辰西川修叩
峽關城又移嶺州於臺登城壬子浙西丁公著奏杭州
八縣災疫賑米七萬石丁巳以鹽州刺史王晏平檢校

左散騎常侍御史大夫靈鹽節度使已未興平縣人上官興因醉殺人而亡竄官捕其父囚之興歸待罪有司京兆尹杜棕御史中丞宇文鼎以興自首免父之囚其孝可弊請免死詔兩省參議皆言殺人者死古今共守典不可免上竟從棕等議免死決杖八十配流靈州庚申詔如聞諸道水旱害人疾疫相繼宵旰罪已興寢疚懷今長吏奏申札瘥猶甚蓋教化未感於蒸人精誠未格於天地法令或爽官吏爲非有一於茲皆傷和氣並委中外臣僚一一具所見聞奏朕當親覽無憚直言其遭災疫之家一門盡歿者官給凶器其餘據其人口遭

疫多少與減稅錢疫疾未定處官給醫藥諸道既有賑
賜國費復慮不充其供御所須及諸公用量宜節減以
救凶荒六月壬戌朔丙寅京兆尹杜棕兼御史大夫戊
寅右僕射王涯奉敕準令式條疏士庶衣服車馬第舍
之制度敕下後浮議沸騰杜棕於敕內條件易施行者
寬其限事竟不行公議惜之秋七月辛卯朔甲午以諫
議大夫王彥威戶部郎中楊漢公祠部員外郎蘇滌右
補闕裴休並充史館修撰故事史官不過三員或止兩
員今四人並命論者非之戊申原王遶薨癸丑以前靈
武節度使李文悅爲充海沂密節度使己未以河中節

度使李程爲左僕射以戶部尙書判度支王起檢校吏部尙書河中晉慈隰節度使以御史中丞兼刑部侍郎宇文鼎爲戶部侍郎判度支八月辛酉朔吏部尙書崔羣卒以駕部郎中知制誥李漢爲御史中丞乙丑以尙書右丞判太常卿王璠檢校禮部尙書潤州刺史浙西觀察使庚午山南東道節度使裴度來朝壬申以前浙西觀察使丁公著爲太常卿甲戌御史中丞李漢奏論僕射上事儀不合受四品已下官拜時左僕射李程將赴省上故也詔曰僕射上儀近定所緣拜禮皆約令文已經施行不合更改宜準大和四年十一月十六日敕

處分九月庚寅朔淄青初定兩稅額五州一十九萬三千九百八十九貫自此淄青始有上供庚子以太子太傅趙宗儒守司空致仕辛丑涿州置新城縣古督亢之地也丁未太常卿丁公著卒庚戌司空致仕趙宗儒卒壬子以右金吾衛將軍史孝章爲鄆州刺史鄆坊丹延節度使冬十月庚申朔甲子詔魯王永宜冊爲皇太子壬午以左金吾衛將軍李昌言檢校左散騎常侍夏綏銀宥節度使甲申以諫議大夫王彥威爲河中少尹以其論上官興獄太徼訐故也十一月己丑朔丁未淮南節度使檢校右僕射崔從卒乙卯以荆南節度使段文

昌爲劍南西川節度使依前檢校左僕射同平章事十
二月己未朔乙丑以中書侍郎同平章事牛僧孺檢校
右僕射同平章事揚州長史淮南節度使戊辰內養王
宗禹渤海使迴言渤海置左右神策軍左右三軍一百
二十司畫圖以進以尙書右丞崔瑄爲江陵尹荆南都
團練觀察使己珍王誠薨乙亥昭義軍節度使劉從諫
來朝丁未案是月無
丁未誤以前西川節度使李德裕爲兵部

尙書責授循州司馬杜元穎卒贈湖州刺史

七年春正月己丑朔御含元殿受朝賀比年以用兵雨
雪不行元會之儀壬辰故事吳蜀貢新茶皆於冬中作法

爲之上務恭儉不欲逆其物性詔所供新茶宜於立春
後造甲午加劉從諫同平章事襄州裴度奏請停臨漢
監牧從之此監元和十四年置馬三千二百匹廢百姓
田四百餘頃停之爲便己亥以太府卿崔珙爲廣州刺
史嶺南節度使壬子詔朕承上天之睠佑荷列聖之不
圖宵旰憂勞不敢暇逸思致康乂八年於茲而水旱流
行疾疫作沴兆庶艱食札瘥相仍蓋德未動天誠未感
物一類失所其過在予載懷罪己之心深軫納隍之歎
如聞關輔河東去年亢旱秋稼不登今春作之時農務
又切若不賑救懼至流亡京兆府賑粟十萬石河南府

河中府絳州各賜七萬石同華陝虢晉等州各賜十萬石並以常平義倉物充以新除嶺南節度使崔珙檢校工部尚書武寧軍節度使以右金吾衛將軍王茂元爲嶺南節度使丙辰以前武寧軍節度使高瑀爲刑部尚書嶺南五管及黔中等道選補使宜權停一二年二月己未朔己巳以吏部侍郎庾承宣爲太常卿癸酉以宗正卿李詵爲陝州防禦使代崔咸以咸爲右散騎常侍己卯麟德殿對吐蕃渤海牂牁昆明等使辛巳御史臺奏均王傅王堪男禎國忌日於私第科決罰人詔曰準令國忌日禁飲酒舉樂決罰人吏都無明文起今後從

有此類不須舉奏王禎宜釋放丙戌詔以銀青光祿大夫守兵部尚書上柱國贊皇縣開國伯食邑七百戶李德裕本官同中書門下平章事三月戊子朔庚寅以前

戶部侍郎楊嗣復爲尚書左丞

辛卯幽州盧龍軍節度使楊志誠執春衣使邊

奉鸞送奚契丹使尹士恭

壬辰以左散騎常侍張仲方爲太子賓客

分司仲方爲郎中時常駿故相李吉甫謚德裕秉政仲方請告因授之己亥嶺南節度使李諒卒辛丑和王綺薨復於塌橋置宿州割徐州符離縣蘄縣泗州虹縣隸之以東都鹽鐵院官吳季真爲宿州刺史癸卯以京兆尹駙馬都尉杜悰檢校禮部尚書鳳翔隴右節度使已

西安南奏蠻寇當管金龍州當管生獠國赤珠落國同
出兵擊蠻敗之庚戌出給事中楊虞卿爲常州刺史中
書舍人張元夫爲汝州刺史以太府卿韋長爲京兆尹
丙辰以散騎常侍嚴休復爲河南尹丁巳以給事中蕭
澣爲鄭州刺史夏四月戊午朔辛酉九姓迴鶻可汗卒
癸亥前鳳翔節度使檢校司空竇易直卒癸酉以同州
刺史吳士矩爲江西觀察使以吏部侍郎高鉞爲同州
刺史庚辰以工部侍郎李固言爲尙書左丞中書舍人
楊汝士爲工部侍郎壬午以河南尹白居易爲太子賓
客分司東都甲申以江西觀察使裴誼爲宣歙觀察使

代沈傅師以傅師爲吏部侍郎以右金吾衛將軍唐宏
實使迴鶻冊九姓迴鶻愛登里羅汨沒密施合句錄毗
伽彰信可汗五月丁亥朔丁酉以李聽爲鳳翔隴右節
度使依前檢校司徒兼太子太保癸卯興元李載義來
朝癸丑以前邛州刺史劉旻爲安南都護六月丁巳朔
己巳以山南西道節度使李載義爲太原尹北都留守
河東節度使依前守太保同平章事壬申以御史中丞
李漢爲禮部侍郎以工部尙書翰林侍講學士鄭覃爲
御史大夫甲戌以刑部尙書高瑀爲太子少保分司地震
乙亥以中書侍郎同平章事李宗閔檢校禮部尙書同

平章事兼與元尹山南西道節度使丁丑以右金吾衛

將軍李從易爲桂管觀察使己卯以右神策大將軍李

用爲邠寧節度使河陽修防口堰役工四萬漑濟源河

內溫縣武德武涉五縣田五千餘頃癸未涇原節度使

張惟清卒乙酉以前河東節度使令狐楚檢校右僕射

兼吏部尙書秋七月丙戌朔丁亥以右龍武統軍康志

睦爲四鎮北庭行軍涇原節度使

表丁酉李德裕爲中書侍郎

壬寅

以金紫光祿大夫守右僕射諸道鹽鐵轉運使上柱國

代郡公食邑二千戶王涯可本官同中書門下平章事

領使如故甲辰尙書右丞李固言等奏狀論僕射省中

上事不合受四品已下拜敕旨宜準大和四年十一月十六日敕處分乙巳虢州刺史崔元亮卒以尙書左丞楊嗣復檢校禮部尙書劍南東川節度使以戶部侍郎庾敬休爲尙書左丞己酉以旱命京城諸司疏決繫囚壬子敕應任外官帶一品正京官者縱不知政事其俸料宜兼給癸丑以左僕射李程檢校司空兼汴州刺史宣武軍節度使甲寅以旱徙市左降官開州司馬宋申錫卒詔許歸葬閏月乙卯朔詔曰朕嗣守丕圖覆軀生類兢業寅畏上承天休而陰陽失和膏澤愆候害我稼穡災於黔黎有過在予敢忘咎責從今避正殿減供膳

停教坊樂殿馬量減芻粟百司厨饌亦宜權減陰陽鬱
堙有傷和氣宜出宮女千人五坊鷹犬量須減放內外
修造事非急務者並停時久無雨上心憂勞詔下數日
雨澤霑洽人心大悅乙丑以前宣武軍節度使楊元卿
爲太子太保戊辰以給事中崔戎爲華州刺史癸未以
太子賓客李紳檢校左散騎常侍兼越州刺史浙東觀
察使代陸亘以亘爲宣歙觀察使八月甲申朔御宣政
殿冊皇太子永是日新書庚寅降詔應犯死降徒流流已下
遞減一等諸王自今年後相次出閣授繁望已上州刺
史佐其十六宅諸縣主委吏部於選人中簡擇配匹具

以名聞皇太子方從師傅傳授六經一二年後當令齒
冑國庠以興墜典宜令國子選名儒宜五經博士各一
人其公卿士族子弟明年已後不先入國學習業不在
應明經進士限其進士舉宜先試帖經并畧問大義取
經義精通者放及第卿大夫者下人之所視遠方之所
倣若非恭儉克己廉貞任人而望其服從固不可得况
朕不寶珠玉不御織華逮於六宮皆務儉薄卿大夫得
不協朕此志率先兆人比年所頒制度皆約國家令式
去其甚者稍謂得中而士大夫苟自便身安於習俗因
循未革以至於今百官士族起今年十月其衣服輿馬

並宜準大和六年六月七日敕如有固違重加黜責文武常參官及諸州府長官子爲父後者賜勲兩轉癸巳太子太保楊元卿卒戊申以京兆尹韋長兼御史大夫以刑部尙書高瑀爲忠武軍節度使九月甲寅朔丙戌侍御史李款閤內奏彈前邠州行軍司馬鄭注曰注內通敕使外連朝官兩地往來卜射財貨晝伏夜動干竊化權人不敢言道路以目請付法司推劾情款旬日之中諫章數十上由是授注通王府司馬兼侍御史充神策軍判官中外駭歎甲戌以前忠武軍節度使王智興依前守太傅兼侍中河中尹河中晉絳慈隰節度使代

王起以起爲兵部尙書冬十月癸未朔揚州江都等七縣水害稼壬辰上降誕日僧徒道士講論於麟德殿翼日御延英上謂宰臣曰降誕日設齋起自近遠朕緣相承已久未可便革雖置齋會唯對王源中等暫入殿至僧道講論都不臨聽宰相路隨等奏誕日齋會誠資景福本非中國教法臣伏見開元十七年張說源乾曜請以誕日爲千秋節內外宴樂以慶昌期頗爲得體上深然之宰臣因請十月十日爲慶成節上誕日也從之辛酉

案是月無辛酉誤

潤常蘇湖四州水害稼十一月癸丑朔乙

亥涇原節度使康志睦卒已卯以左神策長武城使朱

叔夜爲涇州刺史涇原節度使壬午於銀州置監牧十
二月癸未朔己亥刑部詳定大理丞謝登新編格後敕
六十卷令刪落詳定爲五十卷庚子幸望春宮聖體不

康癸卯天平

當作平盧

軍節度使檢校司空王承元卒丁未

以河南尹嚴休復檢校禮部尚書平盧軍節度淄青登
萊棣觀察等使戊申以給事中王質權知河南尹以河

東節度副使李石爲給事中

表是年路隨爲太子太師

八年春正月癸丑朔丁巳聖體痊平御太和殿見內臣
甲子御紫宸殿見羣臣丙寅修太廟令太常卿庾承宣
攝太尉徧告九室遷神主於便殿癸酉揚楚舒廬壽滌

和七州去年水損田四萬餘頃二月壬午朔日有食之

庚寅詔以聖躬痊復赦繫囚放逋賦移流人已亥蔚州

飛狐鎮置鑄錢院三月壬子朔甲寅上巳賜羣臣宴於

曲江亭

表戊午王涯檢校司空兼中書侍郎

庚午以山南東道節度使裴

度充東都留守依前守司徒兼侍中以東都留守李逢

吉檢校司徒兼右僕射癸酉充海節度使李文悅卒丙

子以尚書右丞李固言爲華州刺史代崔戎以戎爲充

海觀察使夏四月壬午朔

丙戌詔答罪毋鞭背

壬辰集賢學士裴

潏撰通選三十卷以擬昭明太子文選潏所取偏僻不

爲時論所稱甲午以宿州刺史吳季真爲邕管經畧使

乙巳翰林學士兵部侍郎王源中辭內職乃以源中爲

禮部尚書五月辛亥朔己巳修奉太廟畢以吏部尚書

令狐楚攝太尉徧告神主復正殿飛龍神駒中殿火六

月庚辰朔辛巳徙市壬午大理卿劉遵古卒

丙戌莒王
王紆薨

辰陳許節度使高瑀卒甲午以旱詔諸司疏決繫囚丙

申以前鳳翔節度使駙馬都尉杜悰起復檢校戶部尚

書忠武軍節度使戊戌宰臣王涯路隨奏請依舊制讀

時令庚子充海觀察使崔戎卒辛丑同州刺史高鉞卒

戊申以將作監駙馬都尉崔杞爲充海沂密觀察使秋

七月庚戌朔丙辰以工部侍郎楊汝士爲同州刺史戊

午奉先美原櫟陽等縣雨損夏麥辛酉定陵臺大雨震
東廊廊下地裂一百三十尺詔宗正卿李仍叔啟告修
塞癸卯郟王經薨己巳夜月犯昴壬申以右金吾衛大
將軍段伯倫檢校工部尚書福建觀察使堂帖中外臣
僚各舉善周易學者八月己卯朔右龍武統軍董重質
卒庚寅太白犯熒惑辛卯詔故澧王大男漢可封東陽
郡王第二男源可封安陸郡王第三男演可封臨安郡
王故深王大男潭可封河內郡王第二男淑可封吳興
郡王故絳王大男洙可封新安郡王第二男滂可封高
平郡王故洋王大男沛可封潁川郡王淄王大男澣可

封許昌郡王沔王大男瀛可封晉陵郡王郟王大男溥
可封平陽郡王仍並賜光祿大夫丙申罷諸色選舉歲
旱故也已亥御寫周易義五道示羣臣有人明此義者
三日內聞奏時李仲言以易道惑上及下其義人皆竊
笑卒無進言者九月己酉朔辛亥夜彗起太微近郎位
西指長丈餘西北行凡九夜越郎位西北五尺滅癸丑
月入南斗乙卯宣歙觀察使陸亘卒己未宰臣李德裕
進御臣要畧及柳氏舊聞三卷隨州刺史杜師仁前刺
吉州坐贓計絹三萬疋賜死於家故江西觀察使裴誼
乖於廉察削所贈工部尚書庚申右軍中尉王守澄宣

召鄭注對於浴室門仍賜錦綵銀器是夜彗出東方長三尺輝耀甚偉辛酉以權知河南尹王質爲宣歙觀察使吏部尙書致仕張正甫卒癸亥以吏部侍郎鄭澣爲河南尹甲子鄭注進藥方一卷庚午安王溶潁王灑皆檢校兵部尙書宰相路隨冊拜太子太師冬十月辛巳幽州節度使楊志誠監軍使李懷侹悉爲三軍所逐立其部將史元忠爲留後陝州江西旱無稼己丑祕書監崔威卒庚寅以山南西道節度使檢校禮部尙書同平章事上柱國襄武縣開國侯食邑一千戶李宗閔可中書侍郎同中書門下平章事辛卯以中使田全操充皇

太子見太師禮儀使壬辰召國子四門助教李仲言對
於思政殿賜緋河南府鄧州同州揚州並奏旱蟲傷損
秋稼甲午以銀青光祿大夫守中書侍郎同平章事李
德裕檢校兵部尙書同平章事興元尹山南西道節度
使以助教李仲言爲國子周易博士充翰林侍講學士
皇太子見太師路隨於崇明門丙申諫官上疏論李仲
言不合擢任上令中使宣諭諫官曰朕留仲言禁中顧
問經義敕命已行不可遽改淮南兩浙黔中水爲災民
戶流亡京師物價暴貴庚子詔鄭注對於太和殿以御
史大夫鄭覃爲戶部尙書壬寅翰林院宴李仲言賜法

幽弟子二十人奏樂以寵之丙午以新除興元節度使

李德裕爲兵部尙書十一月丁未朔庚戌以左僕射致

仕蕭俛爲太子太傅辛亥以左金吾衛大將軍蕭洪爲

河陽三城節度使襄州水損田壬子滁州奏清流等三

縣四月雨至六月諸山發洪水漂溺戶萬三千八百癸

丑以禮部尙書王源中檢校戶部尙書山南西道節度

使以戶部侍郎李漢爲華州刺史鎮國軍潼關防禦使

成德軍節度使王廷湊卒

其子元逵自稱權勾當節度事

以前河陽節

度使溫造爲御史大夫乙卯幽州節度使楊志誠被逐

入朝下御史臺訊鞫志誠在幽州被服皆爲龍鳳乃流

之嶺外至商州殺之乙亥以兵部尙書李德裕檢校右

僕射鎮海軍節度浙西觀察等使丙子李仲言奏請改

名訓從之

莫州軍亂逐其刺史張惟沆

十二月丁丑朔己卯以昭義

軍節度副使檢校庫部員外郎賜紫金魚袋鄭注爲太

僕卿

降京畿死罪以下

辛巳以棣州刺史韓威爲安南都護癸

未以通王

名缺

爲幽州盧龍軍節度使以權勾當幽州兵

馬使史元忠爲留後甲申許太子太傅蕭俛致仕是夜

天文志丙戌

月掩昴己丑以太子賓客分司張仲方爲左散

騎常侍常州刺史楊虞淵爲工部侍郎己亥以左僕射

李逢吉守司徒致仕以宗正卿李仍叔爲湖南觀察使

代李翱以翱爲刑部侍郎代裴潏以潏爲華州鎮國軍
潼關防禦使昭成寺火

九年春正月丁未朔乙卯以鎮州左司馬王元逵起復
定遠將軍守左金吾衛大將軍檢校工部尙書成德軍
節度鎮冀深趙觀察等使以太常卿庾承宣檢校吏部
尙書天平軍節度使代殷侑以侑爲刑部尙書癸亥巢
縣公湊薨追封齊王壬申司徒致仕李逢吉卒癸酉以
右散騎常侍舒元興爲陝州防禦觀察使以前棣州刺
史田新書早作羣爲安南都護二月丙子朔甲申以司農卿
王彥威兼御史大夫平盧軍節度使丁亥發神策軍一

千五百人修淘曲江如諸司有力要於曲江置亭館者

宜給與閒地辛丑冀王綵薨

新書在三
月辛亥

癸卯京師地震

新書五行志無蓋卽
新紀之三月乙卯也

甲辰以幽州留後史元忠爲盧龍

軍節度使乙巳劍南西川節度使檢校左僕射同平章

事段文昌卒三月

乙卯京師地震舊書五行志同然則
上文癸卯之震乃錯簡也當從新書

庚申以劍南東川節度使楊嗣復檢校戶部尙書成都

尹劍南西川節度使乙丑以歲饑河北尤甚賜魏博六

州粟五萬石陳許鄆曹濮三鎮各賜糙米二萬石庚午

尙書左丞庾敬休卒廢朝一日詔曰官至丞郎朕所親

委不幸云亡者宜爲之廢朝自今丞郎宜準諸司三品

官例罷朝一日夏四月丙子朔丙戌以桂管觀察使李從易爲廣州刺史嶺南節度使以鎮海軍節度浙西觀察等使李德裕爲太子賓客分司東都辛卯以京兆尹賈餗爲浙西觀察使以工部侍郎楊虞卿爲京兆尹仍賜金紫以給事中韓偓爲桂管觀察使丙申以太子太師門下侍郎同平章事路隨

表檢校尚書右僕射平章事

爲鎮海軍

節度浙西觀察等使戊戌詔以新除浙西觀察使賈餗爲

表

中書侍郎同中書門下平章事庚子詔銀青光祿

大夫守太子賓客分司東都上柱國贊皇縣開國伯食邑七百戶李德裕貶袁州長史辛丑大風合三元殿四鳴

吻並皆落壞金吾仗舍廢樓觀城門四十餘所壬寅吏部侍郎沈傳師卒五月乙巳朔丁未以浙東觀察使李紳爲太子賓客分司乙卯以給事中高銖爲浙東觀察使戊午以御史大夫溫造爲禮部尙書以吏部侍郎李固言爲御史大夫辛酉太和公主進馬射女子七人沙陀小兒二人戊辰以金吾大將軍李毗爲黔中觀察使以尙書右丞王璠爲戶部尙書判度支己巳以戶部尙書鄭覃爲秘書監辛未宰相王涯冊拜司空癸酉以河中節度使王智興爲宣武軍節度使依前守太傅兼侍中六月乙亥朔西市火以前宣武軍節度使李程爲河

中節度使庚寅夜月掩歲星癸巳以吏部尙書令狐楚
爲太常卿丁酉禮部尙書溫造卒京兆尹楊虞卿家人
出妖言下御史臺虞卿弟司封郎中漢公并子知進等
八人搗登聞鼓稱寃敕虞卿歸私第己亥以右神策大
將軍劉沔爲涇原節度使壬寅詔以銀青光祿大夫守
中書侍郎同平章事襄武縣開國侯食邑一千戶李宗
閔貶明州刺史時楊虞卿坐妖言人歸第人皆以爲寃
誣宗閔於上前極言論列上怒面數宗閔之罪叱出之
故坐貶秋七月甲辰朔貶京兆尹楊虞卿處州司馬同
正丙午以給事中李石權知京兆尹戊申填龍首池爲

鞠場曲江修紫雲樓彩霞亭辛亥詔以御史大夫李固

言爲

表

守門下侍郎同中書門下平章事壬子再貶李宗

閔處州長史癸丑以右司郎中兼侍御史知雜事舒元
輿爲御史中丞貶吏部侍郎李漢汾州刺史刑部侍郎
蕭澣遂州刺史丁巳詔不得度人爲僧尼戊午貶工部
侍郎皇太子侍讀崔侑洋州刺史吏部郎中張諷夔州
刺史考功郎中皇太子侍讀蘇滌忠州刺史戶部郎中
楊敬之連州刺史辛酉以鄂岳觀察使崔郾爲浙西觀
察使以國子祭酒高重爲鄂岳觀察使壬戌鎮海軍節
度使路隨卒癸亥貶侍御史李甘封州司馬殿中侍御

史蘇特潘州司戶甲子以周易博士李訓爲兵部郎中
知制誥依前充翰林侍講學士丁卯天平軍節度使庾
承宣卒以大理卿羅讓爲散騎常侍以汝州刺史郭行
餘爲大理卿戊辰以刑部尚書殷侑爲天平軍節度使
以吉州刺史裴泰爲邕管經畧使八月甲戌朔以戶部
侍郎李翱檢校禮部尚書山南東道節度使代王起以
起爲兵部尚書判戶部事丙子又貶處州長史李宗閔
潮州司戶丁丑以太僕卿鄭注爲工部尚書充翰林侍
講學士上幸左軍龍首殿因幸梨園含元殿大合樂戊
寅以祕書監鄭覃爲刑部尚書貶翰林學士守戶部侍

郎知制誥李珣江州刺史以鄜坊節度使史孝章爲義
成軍節度使甲申以左神策大將軍趙儋爲鄜坊節度
使甲午貶中書舍人權璩鄭州刺史丙申內官楊承和
於權州安置韋元素象州安置王踐言思州安置仰錮
身遞送言李宗閔爲吏部侍郎時託駙馬沈熾於宮人
宋若憲處求宰相承和踐言元素居中導達故也宗閔
黨楊虞卿李漢蕭澣皆再貶壬寅貶中書舍人高元裕
閩州刺史元裕爲鄭注除官制說注醫藥之功注銜之
故也以蘇州刺史盧周仁爲湖南觀察使九月癸卯朔
姦臣李訓鄭注用事不附已者卽時貶黜朝廷悚震人

不自安是日下詔曰朕承天之序燭理未明勞虛襟以
求賢勵寬德以容衆頃者台輔乖弼諧之道而具僚屬
朋比之風翕然相從實敦彛憲致使薰蕕共器賢不肖
並馳退迹者咸後時之夫登門者有迎吠之客繆鑿之
氣堙鬱未平而望陰陽順時疵癘不作朝廷清肅班列
和安自古及今未嘗有也今旣再申朝典一變澆風埽
清朋附之徒匡飭貞廉之俗凡百卿士惟新令猷如聞
周行之中尙蓄疑懼或有妄相指目令不自安今茲曠
然明喻朕意應與宗閔德裕或新或故及門生舊吏等
除今日已前放黜之外一切不問辛亥以太子賓客分

司東都白居易爲同州刺史代楊汝士以汝士爲兵部侍郎乙卯以涇原節度使劉沔爲振武麟勝節度使丙辰以權知御史中丞舒元興爲御史中丞兼判刑部侍郎庚申以鳳翔節度使李聽爲忠武軍節度使癸亥令內養齊抱真將杖於青泥驛決殺前襄州監軍使陳宏志以有弑逆之罪也丁卯以門下侍郎同平章事李固言表檢校兵部尚書爲興元尹山南西道節度使以翰林侍講

學士工部尚書鄭注檢校右僕射鳳翔隴右節度使戊辰以右軍中尉王守澄爲左右神策觀軍容使兼十二衛統軍己巳詔以朝議郎守御史中丞兼刑部侍郎賜

紫金魚袋舒元興本官同中書門下平章事朝議郎守
兵部郎中知制誥充翰林侍講學士賜緋魚袋李訓可
守尚書禮部侍郎同中書門下平章事仍賜金紫壬申
以刑部郎中兼侍御史知雜事李孝本權知御史中丞
冬十月癸酉朔乙亥杜悰復爲忠武軍節度使李聽爲
太子太保分司東都內出曲江新造紫雲樓彩霞亭額
左軍中尉仇士良以百戲於銀臺門迎之時鄭注言秦
中有災宜興土功獸之乃濬昆明曲江二池上好爲詩
每誦杜甫曲江行云江頭宮殿鎖千門細柳新蒲爲誰
綠乃知天寶已前曲江四岸皆有行宮臺殿百司解署

思復昇平故事故爲樓殿以壯之王涯獻權茶之利乃以涯爲權茶使茶之有權稅自涯始也京兆河南兩畿旱以吏部尚書令狐楚爲左僕射以刑部尚書鄭覃爲右僕射辛巳遣中使李好古齎醕賜王守澄是日守澄卒壬午賜羣臣宴於曲江亭癸未以前嶺南節度使王茂元爲涇原節度使丁亥禮部郎中錢可復兵部員外郎李敬彝駕部員外郎盧簡能主客員外郎蕭傑左拾遺盧茂宏等皆授鳳翔使府判官從鄭注奏請也乙未以新授同州刺史白居易爲太子少傅分司東都以汝州刺史劉禹錫爲同州刺史己亥以前河陽節度使蕭

洪爲鄜坊節度使淄青觀察使王彥威請停管內縣丞
一十九員從之庚子東都留守特進守司徒侍中裴度
進位中書令餘如故以前山南西道節度使王源中爲
刑部尙書十一月壬寅朔乙巳令內養馮叔良殺前徐
州監軍使王守涓於中牟縣以左神策將軍胡沐爲容
管經畧使以大理卿郭行餘爲邠寧節度使丁未鄜坊
節度使趙儋卒巳酉左金吾衛大將軍崔鄴卒癸丑以
左僕射令狐楚判太常卿事右僕射鄭覃判國子祭酒
事表李載義丁巳以戶部尙書判度支王璠爲太原尹
北都留守河東節度使戊午以京兆尹李石爲戶部侍

郎判度支以京兆少尹羅立言權知府事己未以太府卿韓約爲左金吾衛大將軍壬戌中尉仇士良率兵誅宰相王涯賈餗舒元興李訓新除太原節度使王璠郭行餘鄭注羅立言李孝本韓約等十餘家皆族誅時李

訓鄭注謀誅內官詐言金吾仗舍石榴樹有甘露請上

觀之內官先至金吾仗見幕下伏甲遽扶帝輦入內故

訓等敗流血塗地京師大駭旬日稍安

壬戌李訓及河東節度使王璠

邠寧節度使郭行餘御史中丞李孝本京兆少尹羅立言謀誅中官不克訓奔於鳳翔癸亥

新書甲子

詔以銀青光祿大夫右僕射上柱國滎陽郡開國公鄭覃本官同中書門下平章事乙丑詔以朝議郎守戶部

侍郎判度支李石可朝議大夫本官同中書門下平章

事左神策軍中尉仇士良殺王涯賈餗舒元興李孝本羅立言王璠郭行餘鳳翔少尹魏逢丁卯以

左神策大將軍陳君弈爲鳳翔節度使戊辰畫以給事

中李翊爲御史中丞左右軍中尉仇士良魚志宏並兼

上將軍鳳翔監軍使張仲清殺其節度使鄭注已巳仇士良殺右金吾衛大將軍韓約十二月

壬申朔諸道鹽鐵轉運權茶使令狐楚奏權茶不便於

民請停從之殺左金吾衛將軍李貞素翰林學士顧師邕癸酉太子太保張

茂宗卒甲戌敕左右省起居齋筆硯於螭頭下記言記

事丙子以刑部尙書王源中爲天平軍節度使丁丑敕

諸道府不得私置麻日板已卯鳳翔監軍使奏鄭注判

官錢可復等四人並處斬訖庚辰上御紫宸殿謂宰相曰坊市之間人漸安未李石奏曰人情雖安然刑殺過多致此陰沴又聞鄭注在鳳翔招致兵募不少今皆被刑戮臣恐乘此生事切宜原赦以安之上曰然鄭覃又陳理道上曰我每思貞觀開元之時觀今日之事往往憤氣填膺耳癸未儀仗使田全操巡邊迴馳馬入金光門街市訛言相驚縱橫散走賴金吾大將軍陳君賞以其徒立望仙門下至晚方定丁亥

降京師死罪以下

以權知京

兆尹張仲方爲華州防禦使以司農卿薛元賞權知京兆尹左僕射令狐楚奏方鎮節度使等具帑帙帶器仗

就尙書省兵部參辭伏乞停罷如須參謝令具公服從
之時楚引訓注姦謀用王璠郭行餘兵仗遂云不宜以
兵仗入省參辭殊乖事體也物議尤之先是宰相武元
衡被害憲宗出內庫弓箭陌刀賜左右街使俟宰相入
朝以爲翼從及建福門退至是亦停之辛卯置諫院印
開成元年春正月辛丑朔日有食之帝常服御宣政殿受賀
遂宣詔大赦天下改元開成免大和五年以前逋負京畿今歲稅賜文武官階爵
乙巳御紫宸殿宰臣李石奏曰陛下改元御殿人情大
悅全放京兆一年租賦又停四節進奉恩澤所該實當
要切帝曰朕務行其實不欲崇長空文石曰赦書須內

留一本陛下時看之又十道黜陟使發日更付與公事

根本令向外與長吏詳擇施行方盡利害之要丁未以

祕書監韋纘為工部尚書敕楊承和韋元素王踐言崔

潭峻頃遭誣陷每用追傷宜復官爵聽其歸葬以銀州

刺史劉源為夏綬銀宥節度使丙辰望案是月辛丑朔則丙辰為十六

日天文志但云十五日無干支則又當為乙卯而新書之食又在朔日未知孰是日有食之表

單兼門下侍郎李石為中書侍郎二月辛未朔以左散騎常侍羅讓為

江西觀察使乙亥停獻鷲鳥咬犬夜四更京師地震屋瓦皆墮

新書三丙申左武衛大將軍朱叔夜賜死於藍田關天

月誤德軍奏生退渾部落二千帳來投豐州三月庚子朔壬

寅以袁州長史李德裕爲滁州刺史庚申幸龍首池觀
內人賽雨因賦暮春喜雨詩昭義軍節度使劉從諫三
上疏問王涯罪名內官仇士良聞之惕懼是日從諫遣
焦楚長入奏於客省進狀請面對上召楚長慰諭遣之
夏四月庚午朔以河南尹鄭澣爲尚書左丞以太子賓
客分司東都李紳爲河南尹癸酉以亳州刺史裴宏泰
爲義成軍節度使以諫議大夫李讓夷兼權知起居舍
人事己卯以潮州司戶李宗閔爲衡州司馬以江州刺
史李珣爲太子賓客分司東都癸未吏部侍郎李虞仲
卒辛卯淄王協薨甲午詔以山南西道節度使檢校兵

部尚書李固言爲

表

門下侍郎同中書門下平章事以

左僕射諸道鹽鐵轉運使令狐楚檢校左僕射山南西
道節度使丙申李固言判戶部事李石判度支兼諸道
鹽鐵轉運使五月己亥朔癸卯以翰林學士歸融爲御
史中丞丁未以給事中郭承嘏爲華州防禦使給事中
盧載以承嘏公正守道屢有封駁不宜置之外郡乃封
還詔書翼日復以承嘏爲給事中乃以給事中盧鈞代
承嘏守華州乙卯御紫宸殿上謂宰臣曰爲政之道自
古所難李石對曰朝廷法令行則易丁巳以尙書右丞
鄭肅爲陝虢都防禦觀察使前罷觀察復置之以中書

舍人唐扶爲福建觀察使庚申判國子祭酒宰臣鄭覃
奏太學新置五經博士各一人請依王府官例賜以祿
粟從之丙申昭義軍奏開夷儀山路通太原晉州從之

閏月己巳朔

表李固言
罷戶部

甲申以河中節度使李程爲左

僕射判太常卿事乙酉以太子太保分司東都李聽爲
河中節度使丙戌烏集唐安寺踰月方散己丑以神策
大將軍魏仲卿爲朔方靈鹽節度使湖南觀察使盧周
仁進羨餘錢二萬貫雜物八萬段不受還之使貸貧下
戶征稅六月戊戌朔癸亥以河南尹李紳檢校禮部尚
書汴州刺史宣武軍節度使秋七月戊辰朔御史臺奏

祕書省管新舊書五萬六千四百七十六卷長慶二年
已前並無文案大和五年已後並不納新書今請創立

簿籍據闕添寫卷數逐月申臺從之辛未以左金吾衛

將軍傅毅爲鄜坊節度使癸酉宣武軍節度使王智興

卒乙亥辛卯刑部尚書殷侗檢校右僕射山南東道節

度使壬辰以滁州刺史李德裕爲太子賓客分司東都

甲午以金吾衛大將軍陳君賞爲平盧軍節度使代王

彥威以彥威爲戶部侍郎判度支丙申湖南觀察使盧

周仁進羨餘錢一十萬貫御史中丞歸融彈其違制進

奉詔以周仁所進錢於河陰院收貯是月滹八月戊戌

沱溢

朔甲辰詐稱國舅人前鄜坊節度使蕭洪宜長流驩州

戊申以皇太后親弟蕭本爲右贊善大夫

表己酉鄭覃兼國子祭酒

李石罷度支

九月丁卯朔庚辰詔復故左降開州司馬宋申

錫正議大夫尚書右丞同平章事仍以其子慎微爲城

固尉以饒州刺史馬植爲安南都護辛巳以壽州刺史

高承恭爲邕管經畧使辛卯敕祕書省集賢院應欠書

四萬五千二百六十一卷配諸道繕寫冬十月丁酉朔

己酉揚州江都七縣水旱損田十一月丙寅朔庚辰浙

西觀察使崔郾卒以太子賓客分司東都李德裕檢校

戶部尚書浙西觀察使壬午以兵部尚書皇太子侍讀

王起兼判太常卿甲申以左僕射李程兼吏部尚書忠武帥杜悰天平帥王源中奏當道常平義倉斛斗除元額外請別置十萬石十二月丙申朔以京兆尹兼御史大夫薛元賞爲武寧軍節度徐泗宿濠觀察等使以戶部侍郎兼御史中丞歸融爲京兆尹以給事中狄兼謨爲御史中丞己酉嶺南節度使李從易卒庚戌以華州刺史盧鈞爲廣州刺史嶺南節度使以中書舍人崔龜從爲華州防禦使辛亥劍南東川節度使馮宿卒壬子太僕卿段伯倫卒癸丑以兵部侍郎楊汝士檢校禮部尚書劍南東川節度使己未淑王縱薨

二年春正月乙丑朔丙寅宣歙觀察使王質卒乙亥以
吏部侍郎崔鄆爲宣歙觀察使以尚書右丞鄭澣爲刑
部尚書判尚書左丞事庚寅戶部侍郎判度支王彥威
進所撰供軍圖畧序曰至德乾元之後迄於貞元元和
之際天下有觀察者十節度二十有九防禦者四經畧
者三犄角之師犬牙相制大都通邑無不有兵約計中
外兵額至八十餘萬長慶戶口凡三百三十五萬而兵
額又約九十九萬通計三戶資奉一兵今計天下租賦
一歲所入總不過三千五百餘萬而上供之數三之一
焉三分之中二給衣賜自留州留使兵士衣食之外其

餘四十萬衆仰給度支焉二月乙未朔丙申刑部侍郎

郭承嘏卒丙午夜彗出東方長七尺在危初西指戊申

王彥威進所撰唐典七十卷起武德終永貞庚戌

新書
己未

均王緯薨辛酉夜彗長丈餘直西行稍南指在虛九度

半壬戌夜彗長二丈餘廣三尺在女九度自是漸長濶

三月甲子朔內出音聲女伎四十八人令歸家乙丑夜

彗長五丈岐分兩尾其一指氏其一掩房丙寅罷曲江

宴是夜彗長六丈尾無岐在亢七度敕尚食使自今每

一日御食料分爲十日停內修造戊辰夜彗長八丈有

餘西北行東指在張十四度辛未宣徽院法曲樂官放

歸壬申詔曰朕嗣丕構對越上元虔恭寅畏於今一紀
何嘗不宵衣念道晷食思愆師周文之小心慕易乾之
夕惕懼德不類貽列聖羞將欲俗致和平時無殃咎然
誠未格物謫見於天仰愧三靈俯慙庶彙思獲攸濟浩
無津涯昔宋景發言星因退舍魯僖納諫饑不害人取
鑒往賢深惟自勵載軫在予之責宜降恤辜之恩式表
殷憂冀答昭誠天下死罪降從流流已下並釋放唯故
殺人官典犯賊主掌錢穀賊盜不在此限諸州遭水旱
處並蠲租稅中外修造並停五坊鷹隼悉解放朕今素
服避殿徹樂減膳近者內外臣僚繼貢章表欲加徽號

夫道大爲帝朕膺此稱祇愧已多矧鍾星變之時敢議
名揚之美非懲既往且儆將來中外臣僚更不得上表
奏請表已在路並宜速還在朝羣臣方岳長吏宜各上
封事極言得失弼違納誨副我虛懷甲戌以左僕射李
程爲山南東道節度使壬午以楚州刺史嚴譽爲桂管
觀察使甲申以山南東道節度使殷侑爲太子賓客分
司東都貞興門外鵲巢於古冢丁亥邠寧節度使李用
卒戊子以河南尹李珣爲戶部侍郎己丑以金吾大將
軍李直臣爲邠寧節度使壬辰桂管觀察使韓欽卒以
兵部侍郎裴潏爲河南尹夏四月甲午朔戊戌詔將仕

郎守尚書工部侍郎知制誥充翰林學士皇太子侍讀
上騎都尉賜紫金魚袋陳夷行可本官同中書門下平
章事丙子以中書舍人敬昕爲江西觀察使戊申前江
西觀察使羅讓卒巳酉祕書監張仲方卒乙卯以旱避
正殿
宰相李石奏定長定選格庚申河東節度使李載義卒
辛酉詔置終南山神祠蓬州復置蓬池朗池二縣五月
癸亥朔乙丑以東都留守裴度爲太原尹北都留守河
東節度使依前守司徒中書令丙寅戶部侍郎李珣判
本司事以浙西觀察使李德裕檢校戶部尚書兼揚州
長史淮南節度使辛未以前淮南節度使牛僧孺檢校

司空東都留守以蘇州刺史盧商爲浙西觀察使壬申
上幸十六宅與諸王宴樂決十六宅宮市內官范文喜
等三人以供諸王食物不精故也六月癸巳朔丁酉以
成德軍節度使王元逵爲駙馬都尉尚壽安公主己亥
以鴻臚卿李逵爲天德軍都防禦使庚子吏部奏長定
選格請加置南曹郎中一人別置印一面以新置南曹
之印爲文從之丙午河陽軍亂逐節度使李泳戊申以
左金吾衛將軍李執方爲河陽三城懷州節度使庚戌
以右金吾衛大將軍崔珙爲京兆尹魏博澤潞淄青滄
德兗海河南府等州並奏蝗害稼鄆州奏蝗得雨自死

丁巳以御史中丞狄兼謨爲刑部侍郎以前京兆尹歸

融爲祕書監以給事中李翊爲湖南觀察使州未編秋

七月壬戌朔癸亥党項羌寇振武乙亥以久旱徙市閉坊門甲申

以太府卿張賈爲兗海觀察使詔除河北三鎮外諸州

府不得以試銜奏官鄆州奏當州先廢天平平陰兩縣

請復置平陰縣以制盜賊從之乙酉以旱蝗詔諸司疏

決繫囚已丑遣使下諸道巡覆蝗蟲是日京畿雨羣臣

表賀汴州李紳奏蝗蟲入境不食田苗詔書褒美仍刻

石於相國寺八月壬辰朔丁酉彗出虛危之間振武奏

突厥入寇營田庚戌詔昭儀王氏冊爲德妃昭容楊氏

冊爲賢妃又詔敬宗皇帝第二子休復第三子執中第四子言揚第六子成美等宜開列土之封用申睦族之典休復可封梁王執中可封襄王言揚可封紀王成美可封陳王癸丑皇第二男宗儉可封蔣王九月乙丑房州刺史盧行簡坐贓杖殺已已以前湖南觀察使盧術爲陝虢觀察使甲申詔曰慶成節朕之生辰天下錫宴庶同歡泰不欲屠宰用表好生非是信尚空門將希无妄之福恐中外臣庶不論朕懷廣置齋筵大集僧衆非獨彫耗物力兼恐致惑生靈自今宴會疏食任陳脯醢永爲常例又敕慶成節宜令京兆尹準上巳重陽例於曲

江會文武百僚延英奉觴宜權停戊子以戶部侍郎判

度支王彥威爲衛尉卿分司東都冬十月辛卯朔詔改

天后所撰三教珠英爲海內珠英戊戌詔嘉王運循王

通通王諶並可光祿大夫檢校司空賜勳上柱國仍依

百官例給料錢

案新書德宗紀及兩書諸王傳嘉王運皆貞元十七年薨循王通雖亡薨年然

考代宗諸王唯原王達薨於大和六年餘則未有在文宗朝者此疑有誤

安王溶潁王灑並

給料錢庚子慶成節賜羣臣宴於曲江上幸十六宅與

諸士宴樂癸卯宰臣判國子祭酒鄭覃進石壁九經一

百六十卷時上好文鄭覃以經義啟導稍折文章之士

遂奏置五經博士依後漢蔡伯喈刊碑列於太學創立

石壁九經諸儒校正訛謬上又令翰林勒字官唐元度復校字體又乖師法故石經立後數十年名儒皆不窺之以爲蕪累甚矣戊申以門下侍郎同平章事李固言爲劍南西川節度使依前門下侍郎同平章事甲寅敕鹽鐵戶部度支三使下監院官皆郎官御史爲之使雖更改院官不得移替如顯有曠敗卽具事以聞己未以前西川節度使楊嗣復爲戶部尚書諸道鹽鐵轉運使十一月辛酉朔壬戌以太子賓客分司東都殷侑爲忠武軍節度使表李石罷鹽鐵使癸亥狂病人劉德廣突入含元殿付京兆府杖殺乙丑京師地震丁丑興元節度使令

狐楚卒

有星隕於興元

丁亥以刑部尚書鄭澣爲山南西道節

度使己丑契丹朝貢十二月庚寅朔丙申閣內對左右
史裴素等上自開成初復故事每入閣左右史執筆立
於螭頭之下君臣論奏得以備書故開成政事最詳於
近代壬寅以前忠武軍節度使杜悰爲工部尚書判度
支時悰旣除官久未謝恩戶部侍郎李珣奏杜悰爲岐
陽公主服假內珣因言比來駙馬爲公主行服三年所
以士族之家不願爲國戚者以此帝大駭其奏卽日詔
曰制服輕重必資典禮如聞往者駙馬爲公主行服三
年緣情之義殊非故實違經之制今乃聞知宜行期周

永爲定制

三年春正月庚申朔甲子宰臣李石遇盜於親仁里中
劍斷其馬尾又中流矢不甚傷是時京城大恐捕盜不
獲旣而知仇士良所爲乙丑常參官入朝者九人而已
餘皆潛竄累日方安丁卯詔故齊王濙贈懷懿太子戊
辰以諸道鹽鐵轉運使正議大夫守戶部尚書上柱國
宏農郡開國伯食邑七百戶賜紫金魚袋楊嗣復可本
官同中書門下平章事朝議郎戶部侍郎判戶部事上
柱國賜紫金魚袋李珣可本官同中書門下平章事依
前判戶部事丙子以中書侍郎同平章事李石爲荆南

節度使依前中書侍郎同平章事丁丑以前荆南節度使韋長爲河南尹癸未詔去秋蝗蟲害稼處放逋賦仍以本處常平倉賑貸是日大雪二月巳丑朔乙未上謂宰臣曰李宗閔在外數年可別與一官鄭覃陳夷行曰宗閔養成鄭注幾覆朝廷其姦邪甚於李林甫楊嗣復李珣奏曰大和末宗閔德裕同時得罪二年之間德裕再量移爲淮南節度使而宗閔尚在貶所凡事貴得中不可但徇私情上曰與一郡可也丁酉以衡州司馬李宗閔爲杭州刺史庚子吏部奏去年所修長定選格或乖徃例頗不使人不可久行請却用舊格從之乙巳詔

僕射尚書侍郎左右丞大卿監每遇坐日宜令兩人循
次進對丁未以同州刺史孫簡爲陝虢觀察使代盧術
以術爲福王傅分司東都巴西禮部尚書許康佐卒辛
亥以左丞盧載爲同州防禦使三月巳未朔庚午封故
陳王第十九男儼爲宣城郡王故襄王第三男竇爲樂
平郡王表鄭覃爲太子太師夏四月戊子朔巳丑禮部尚書致仕
徐晦卒辛卯戶部侍郎崔龜從判本司事詔曰戶部侍
郎兩員今後先授上者宜令判本司錢穀加帶平章事
判鹽鐵度支兼中丞學士不在此限壬辰以給事中裴
袞爲華州防禦使表丙申李珣罷戶部巴西改法曲爲仙韶曲仍

以伶官所處爲仙韶院兵部侍郎裴潏卒癸丑屯田郎

中李衢沔王府長史林贊等進所修皇唐玉牒一百五

十卷五月丁巳朔敕禮部貢院進士舉人歲限放三十

人及第辛酉詔前江西觀察使吳士矩坐賊長流端州

庚午月犯心大星癸未以吏部侍郎高錯爲鄂岳觀察

使代高重以重爲兵部侍郎六月丁亥朔辛卯出宮人

四百八十送兩街寺觀安置廢晉州平陽院替官並歸

州縣癸丑上御紫宸殿對宰臣曰幣輕錢重如何楊嗣

復曰此事已久不可遽變其法法變則擾人但禁銅器

斯得其要

是夏漢水溢

秋七月丙辰朔壬戌忠武軍節度使

殷侑卒甲子以衛尉卿王彥威檢校禮部尚書忠武軍節度使以右金吾衛大將軍史孝章爲邠寧節度使戊辰西川節度使李固言再上表讓門下侍郎及檢校右僕射

表楊嗣復罷鹽鐵使

八月丙戌朔甲午山南東道諸州大水

田稼漂盡丁酉詔大河而南幅員千里楚澤之北連亘數州以水潦暴至隄防潰溢旣壞廬舍復損田苗言念黎元懼此災沴或生業蕩盡農功索然困餒彫殘豈能自濟宜令給事中盧宏宣往陳許鄭滑曹濮等道宣慰刑部郎中崔璿往山南東道鄂岳蘄黃等道宣慰己亥

嘉王運薨

案嘉王運兩書本傳皆云貞元十七年薨新書德宗紀同此復兩書皆云薨於是歲以代

宗諸王薨年推
之疑當從傳

魏博六州蝗食秋苗並盡九月丙辰朔

辛酉荆南李石讓中書侍郎乃改授檢校兵部尚書壬

戌上以皇太子慢遊敗度欲廢之御史中丞狄兼謨垂

涕切諫是夜移太子於少陽院殺太子宫人左右數十

人戊辰詔梁王等五人先於北內可却歸十六宅

表已
己陳

夷行爲門下侍郎李珣
楊嗣復爲中書侍郎

辛未易定節度使張璠卒壬申

以易州刺史李仲遷爲定州刺史義武軍節度使戊寅

以東都留守牛僧孺爲左僕射辛巳詔皇太子侍讀竇

宗直隔日入少陽院冬十月乙酉朔以尚書左丞崔瑄

檢校戶部尚書東都留守易定軍亂不納新使李仲遷

立張璠子元益爲留後己丑以少府監張沼爲黔中觀

察使壬辰以右金吾衛將軍高霞寓

案霞寓寶曆二年已卒此誤爲

夏綏銀宥節度使癸巳以中書舍人李景讓爲華州防

禦使甲午慶成節命人以酒脯仙韶樂賜羣臣宴於

曲江亭丁酉夏州節度使劉源卒庚子皇太子薨於少

陽院謚曰莊恪乙巳以左金吾衛將軍郭昉爲邠寧節

度使是夜彗起於軫其長三丈東西指巳酉前邠寧節

度使史孝章卒十一月乙卯朔是夜彗孛東西竟天王

戊詔曰上天蓋高感應必由平人事寰宇雖廣理亂盡

繫於君心從古已來必然之義朕嗣膺寶位十有三年

常克己以恭虔每推誠於衆庶將以導迎休應漸致輯熙期克荷於宗祧思保寧於華夏而德有所未至信有所未孚災氣上騰天文謫見再周期月重擾星躔當求衣之時覩垂象之變兢兢懼惕厲若蹈泉谷是用舉成湯之六事念宋景之一言詳求譴告之端採聽消禳之術必有精理蘊於衆情冀屈法以安人爰恤刑而原下應京城諸道見繫囚自十一月八日巳前死罪降流流已下遞減一等十惡大逆殺人劫盜官典犯賊不在此限今年遭水蝗蟲處並宜存撫賑給以滄州節度使李彥佐爲鄆曹濮節度使以德州刺史滄景節度副使劉約

爲義昌軍節度使癸亥以宋州刺史唐宏實爲邕管經
畧使乙丑天平軍節度使王源中卒庚午以翰林學士
丁居晦爲御史中丞壬申以蔡州刺史韓威爲定州刺
史義武軍節度使十二月乙酉朔辛丑詔以河東節度
使開府儀同三司守司徒中書令太原尹北都留守上
柱國晉國公食邑三千戶裴度守司徒中書令以兵部
侍郎狄兼謨爲河東節度使丙午守太子太師右僕射
門下侍郎國子祭酒同平章事鄭覃爲太子太師仍三
五日入中書日本國貢珍珠絹

四年春正月甲寅朔丁巳熒惑太白辰聚於南斗丁卯

夜於咸泰殿觀燈作樂三宮太后諸公主等畢會上性

節儉延安公主衣裾寬大卽時斥歸駙馬竇滌待罪詔

曰公主入參衣服踰制從夫之義過有所歸滌宜奪兩

月俸錢癸酉彗星出於羽林閏月甲申朔以吏部侍郎鄭肅檢校

禮部尚書河中晉絳慈隰節度使以蘇州刺史李道樞

爲浙東觀察使以諫議大夫高元裕爲御史中丞丙申

以前河中節度使李聽爲太子太保巳亥裴度自太原

至上令中人就第問疾辛丑以司農卿李玘爲福建觀

察使諫官論其不可乃罷之丙午以大理卿盧貞爲福

建觀察使彗出於卷舌丁未興元節度使鄭澣卒戊申闍婆

國朝貢二月癸丑朔辛酉以吏部侍郎歸融檢校禮部尚書山南西道節度使丙寅寒食節上御通化門以觀遊人戊辰幸勤政樓觀角觝蹴鞠三月癸未朔乙酉賜羣臣上巳宴於曲江是夜月掩東井第三星丙戌司徒中書令裴度卒癸卯浙東觀察使李道樞卒以戶部侍郎崔龜從爲宣歙觀察使代崔鄆以鄆爲太常卿以楚州刺史蕭倣爲浙東觀察使夏四月壬子朔以右羽林統軍李昌言爲鄜坊節度使壬戌有麋出太廟五月辛巳朔丁亥閣內上謂宰臣曰新修開元政要如何楊嗣復曰臣等未見陛下欲以此書傳示子孫則宣付臣等

參定可否緣開元政事與貞觀不同元宗或好畋遊或
好聲色選賢任能未得盡美撰述示後所貴作程豈容
易哉丙申鄭覃陳夷行罷知政事覃守右左僕射夷行
爲吏部侍郎丙午邠寧節度使郭晷卒天平魏博易定
蝗食秋稼六月辛亥朔以長武城使符澈爲邠寧節度
使庚申上幸十六宅安王潁王院宴樂賜與頗厚戊辰
以久旱分命祠禱每憂動於色宰臣等奏曰冰旱時數
使然乞不過勞聖慮上改容言曰朕爲人主無德及天
下致茲災旱又謫見於天若五日不雨當退歸南內更
選賢明以主天下宰臣嗚咽流涕各請策免是夜大雨

霑霑丁丑襄陽山竹結實其米可食秋七月庚辰朔西

蜀水害稼乙未

天文志
辛丑

夜月犯熒惑壬寅以河南尹韋

長爲平盧軍節度使以刑部侍郎高錯爲河南尹甲辰
以中大夫守太常卿上柱國賜紫金魚袋崔鄆可本官
同中書門下平章事滄景淄青大水八月庚戌朔以給
事中姚合爲陝虢觀察使辛亥鄜王憬薨丙辰邢州廢
青山縣磁州移昭義縣於固鎮驛癸亥以左僕射牛僧
孺檢校司空同平章事襄州刺史山南東道節度使辛
未夜流星出羽林尾長八十餘尺滅後有聲如雷壬申
鎮冀四州蝗食稼至於野草樹葉皆盡九月巳卯朔辛

卯以劍南東川節度使楊汝士爲吏部侍郎丁酉夜月
掩東井第三星辛丑以吏部侍郎陳夷行爲華州鎮國
軍防禦使以蘇州刺史李穎爲江西觀察使以諫議大
夫馮審爲桂管觀察使甲辰以京兆尹鄭復爲劍南東
川節度使丙午以前江西觀察使敬昕爲京兆尹冬十
月己酉朔戊午慶成節賜羣臣宴於曲江辛酉新書天文志戊
午夜辰星入南斗魁前桂管觀察使嚴譽卒丙寅制以

敬宗第六男陳王成美爲皇太子

甲戌地震

丁丑太子太保

李聽卒十一月己卯朔壬午前福建觀察使唐扶卒

表揚

嗣復爲門下侍郎
崔郾爲中書侍郎

己亥曲赦京城繫囚十二月己酉朔

癸丑貶光祿卿駙馬都尉韋讓澧州長史乙卯乾陵火
以杭州刺史李宗閔爲太子賓客分司東都辛酉上不
康百僚赴延英起居乙亥宰臣入謁見上於太和殿是
歲戶部計見管戶四百九十九萬六千七百五十二

五年春正月戊寅朔上不康不受朝賀己卯詔立親弟

頴王灑爲皇太弟權勾當軍國事皇太子成美復爲陳

王

庚辰仇士良殺仙
韶院副使尉遲瑋

辛巳上崩於大明宮之太和殿壽

享三十三羣臣上諡曰元聖昭獻皇帝廟號文宗其年
八月十七日葬於章陵

史臣曰昭獻皇帝恭儉儒雅出於自然承父兄奢弊之

餘當闡寺撓權之際而能以治易亂化危爲安大和之初可謂明矣初帝在藩時喜讀貞觀政要每見太宗孜孜政道有意於茲洎卽位之後每延英對宰臣率漏下十一刻故事天子隻日視事帝謂宰輔曰朕欲與卿等每日相見其輟朝放朝用雙日可也時憲宗郭后居興慶宮曰太皇太后敬宗母寶麻太后及上母蕭太后時呼三宮太后帝性仁孝三宮問安其情如一嘗內園進櫻桃所司啟曰別賜三宮太后帝曰太后宮送物焉得爲賜遽取筆改賜爲奉宗正寺以祭器朽敗請易之及有司呈進命陳於別殿具冠帶而閱之容色悽然尤勤

於政理凡選內外羣官宰府進名帝必面訊其行能然後補除中書用鴻臚卿張賈爲衢州刺史賈好博朝辭日帝謂之曰聞卿善長行對曰政事之餘聊與賓客爲戲非有所妨帝曰豈有好之而無妨也內外聞之悚息而帝以累世變起禁闈尤側目於中官欲盡除之然訓注狂狡之流制御無術矢謀旣誤幾致顛危所謂有帝王之道而無帝王之才雖旰食焦憂不能弭患惜哉贊曰昭獻統天洪惟令德心憤警恥志除兇慝未殄夔魑又生鬼域天未好治亂何由息

新書贊曰春秋之法君弑而賊不討則深責其國以爲無臣子也憲宗之法君弑而賊猶在至於文宗

不能明宏志等罪惡以正國之典刑僅能殺之而已
是可歎也穆敬昏童失德以其在位不久故天下未
至於敗亂而敬宗卒及其身是豈有討賊之志哉文
宗恭儉儒雅出於天性嘗讀太宗政要慨然慕之及
卽位銳意於治每延英對宰臣率漏下十一刻唐制
天子以隻日視朝乃命輟朝放朝皆用雙日凡除吏
必召見訪問親察其能否故大和之初政事修飭號
爲清明然其仁而少斷承父兄之弊宦官撓權制之
不得其術故其終困以此甘露之事禍及忠良不勝
冤憤飲恨而已由是言之其能殺宏志亦足伸其志
也昔武丁得一傅說爲商高宗武宗用一李德裕遂
成其功烈然其奮然除去浮圖之法甚銳而躬受道
家之錄服藥以求長年以此見其非明智之不惑者
特好惡有不同爾宣宗精於聽斷而以察爲明無復
仁恩之意嗚呼自
是而後唐衰矣

唐書卷第十八